




1790

7990.2

v.1



EAST ASIAN LIBRARY
CHINESE COLLECTION

APR 8 1942

哥倫比亞大學
中文圖書館章



[From the library of
John Baker Clark
Oct 15, 1940]

April 8, 1942

孔教經世法目錄

自序

第一卷

第二卷

第三卷

第四卷

第五卷

第六卷

第七卷

總論

孔教總義

修身

教化

理財

夫婦

孝弟

中華高要陳煥章重遠撰

第八卷

國家

第九卷

和平要旨

第十卷

君民

第十一卷

職官

第十二卷

外交通義

第十三卷

國君外交

第十四卷

使臣

第十五卷

國際聯合

第十六卷

國際睦誼

第十七卷

保國

中華書局影印

第十八卷

論兵

第十九卷

戰律

第二十卷

夷狄

第二十一卷

盜殺

第二十二卷

歷代和平論

第二十三卷

諸子和平論

第二十四卷

結論

卷之二十一
卷之二十
卷之十九
卷之十八

卷之十七
卷之十六
卷之十五
卷之十四

自序

是書本為美國迦匿奇萬國和平基金會而作。當孔子二千四百六十五年二月七日，由美國華駐華公使芮恩施博士與余訂約於北京。其題目為中國人對於和戰之學說。余之本意固欲以孔子為全書之中堅。然其始尚欲分孔教及非孔教兩部求之。而斷代依人為目。最後由余親自考訂。覺得中國人之學說。惟孔教足以代表之。而孔子之著作莫大於六經。實為孔教之淵海。若舍六經而他求。是為舍本逐末。故首以窮經為事。經之言和戰者莫詳於春秋。故余頗欲就春秋而著一孔子國際法。後念孔教之大無所不有。僅以國際法言之未免狹小。譬如孔教以脩身為本。篤恭而天下平。則脩身不可

不言也。正家而天下定，則齊家不可不言也。至於治國之大經大法，動與和戰有關，益不能舍而不言矣。故作是書之初意，雖欲專以論和戰者為主，後乃不得不追本窮源，於一切可使世界永久和平而戰禍不作之經義，悉採輯之矣。乃至其與和戰無關而當連類並及者，亦收納之矣。規模既大，內容豐富，故是書名曰孔教經世法也。然而全神所注，總在和平，際於治國平天下之法，最為注重。世有欲知孔子之憲法及孔子之國法者，當於是書觀之矣。

是書分二十四卷，以總論為第一，全書之冒也。孔教總義第二，孔教之綱領也。修身第三，自天子以至於庶人，壹是皆以修身為本也。蓋以個人為單位也。教化第四，理財第五，此統乎家國天下而言者也。

故以之次脩身其名教一章。殆孔子律法之總綱也。夫婦第六。孝弟第七。此齊家之法也。國家第八。此為治平總義。國際法之綱領也。和平要旨第九。此專言和平之學說也。君民第十。職官第十一。此國內之憲法也。外交通義第十二。國君外交第十三。使臣第十四。國際聯合第十五。國際睦誼第十六。此皆平時國際法也。保國第十七。論兵第十八。戰律第十九。此戰時國際法也。而泛論戰爭者亦屬之。夷狄第二十。此進退國際員於國際團體之法也。盜殺第二十一。此抑盜殺於夷狄之下。賤之使不齒於人類。所以保世界之和平也。故字數雖甚少。而特使之自為一卷也。除第一卷不計外。以上二十卷皆本書之正全。以經義為主。所謂孔教經世法者此也。至第二十二卷

歷代和平論則分代以觀之。第二十三卷諸子和平論則分家以考之。皆本書之餘波。所以括盡中國人之學說也。故是書亦可依芮恩施博士最初所命之題。名為中國人對於和戰之學說也。結論第二十四則全書之結也。

是書體例頗本於白虎通。蓋以義理分類。貫穿諸經。而又稽合乎歷代諸儒經說。旁及子史文集。頭緒紛繁。比之依人為目者。其難易相去甚遠也。所以不憚煩而故為其難者。亦欲發明孔教之義理於天下。整齊而貫通之。使世界和平之局。得以速成耳。豈不自苦其難哉。

是書經始於訂約之後。然其時身在廣東。因辦理水災善後。不便著

述至孔子二千四百六十六年九月。余由曲阜還北京。始克注全力於此。蓋其時袁世凱之帝制運動最烈。余韜光養晦。不願與聞外事。日夜專著此書。故能日起有功也。然余以孔教會之主任。居在北京。乃獨不隨各人及各團體之後。上書勸進。而惟以著書講學為事。深犯袁世凱之忌。故偵察綦嚴。厥後滇南興師。各省響應。北京風聲鶴唳。日虞大禍之猝發。欲遷避者屢矣。徒以是書未成。各種參考書籍艱於隨帶。故不能遷。嘗自思曰。倘或以不遷而遭不測。則實是書為之累矣。然以安於命而止。嗚呼。今日是書之幸得告成。余誠感謝上天保佑之恩。及聖師啟牖之德矣。

至聖先師二千四百六十八年三月三日即中華民國六年四月二

十三日陳煥章序於北京衍聖公府內孔教會事務所

卷第一 總論

中國人為愛和平之人種。故其學說說為和平之學說。其歷史亦為和平之歷史。此皆信而有徵。不特中國人自知之。即各國人亦共仰之者也。今欲詳述中國人之和平學說。謹先畧述其歷史。以見中國人之特質。且以見其學說之並非徒託空言也。

中國之歷史。一和平之歷史也。數千年來。除分爭割據之短促時期外。皆為太平一統之世。其民之不見兵革者。多則逾百年。少亦數十年。蓋世界各國。其黃金時代。為期之久。為數之多。未有能比中國者也。以此和平之歷史。故其所生之效果。有十

一 人口之繁殖

自上古以來。中國人口。已為大地冠。

二 家族之保聚

人民不以短期之爭戰而流亡故族制之發達

為萬國冠

三 人種之融合

中國自古迄今未嘗有因種族而戰者故中國

向無種界

四 國土之統一

中國人既不好戰故分者暫而合者常與歐洲

之諸國競立不同

五 藩屬之自由

中國人待藩屬最為寬大而藩屬亦安之

六 對外之自保

中國對於外國向不持攻取主義惟自衛而已

七 文化之長進

中國之道德宗教言語文學為世界之冠

八 政府之穩固

歷代統一政府之能久存者以其不好戰也而

民亦不好亂。

九 軍人之輕微

中國未嘗以兵立國。故兵無以異於平民。

十 國家之老壽

中國最愛和平。故亦足自保。大地之文明古國。

惟中國最壽。

以上十者。皆和平所生之結果。而為中國獨有之產物。超越乎各國之上者也。是十者既為和平之果。亦為和平之因。吾將於下文論之。今所論者。不過取歷史之事實。以證明中國人為愛和平之人種。其歷史為和平之歷史而已。

中國人種何以最愛和平。其歷史何以為最和平之歷史。筦其要者。厥惟學說。吾將於本書詳論之。然學說亦有所從出。則請先明中國

和平學說之所由生

其一由於地理之統一也。中國為大陸國，平原萬里，高山大川，其形廣大而平行，其勢雄闊而厚重，其氣寬博而疏達，故其所居之民族最愛和平。與島國之民及半島之民均異其性。歐洲雖曰大陸，然其實不過亞洲之半島，故在昔希臘羅馬之時，除亞歷山大及愷撒所知者不過市府國家於泱泱大國之風，殆未夢見。雖在柏拉圖其理想之共和國亦不過一市府國家，且每事以戰爭為主，然則今日歐洲之發生空前大戰，更不足異也。蓋其地勢破碎而錯綜，島嶼及半島甚多，無統一之象，故其民之相猜相忌，相攻相取，幾成為天性。與中國之地理適相反也。

其二、由於人種之純一也。傳曰：非我族類，其心必異。故種族複雜者，每多誤會而起戰爭。中國之人種，雖亦複雜，然華種既為最大多數，則實以華種為主，而諸種同化之。故中國自有史以來，並無所謂種族問題，更無因種族而起戰爭之事。

其三、由於宗教之統一也。中國自古為信教自由之國。凡地球各教，靡不納受。然亦自古以孔教為國全^教國之信仰。究以孔子為宗。孔教之和平學說，乃本書主體。今所言者，不過明孔教有統一國民心理之力量，雖有異教並行，而無從啟爭耳。

其四、由於家族之維繫也。凡人子身孤立，無所顧慮，則徇其血氣之勇，亦何所不至。惟中國之家族制度最密，其惡戰爭而樂和平也。

不獨由於愛身。乃實由於愛家。蓋一身尚不足惜。而因此累及全家。則戰之為禍烈也。有子曰。其為人孝弟而好犯上者鮮矣。不好犯上而好作亂者。未之有也。（論語第二）此中國內戰之所以少也。昔孔子三百七十三年。漢文帝有言曰。必多殺士卒。傷良將吏。寡人之妻。孤人之子。獨人父母。得一亡十。朕不忍為也。（漢書第九十五）斯言也。足以代表中國人愛家而惡戰之心矣。此國戰之所以少也。其五。由於生業之重農也。凡遊牧之民。樂於戰鬥。耕稼之民。樂於和平。中國自古以農立國。最不宜於戰爭。雖講武之事。亦須農隙方可為之。故孔子重使民以時。（論語第二）孟子重不違農時。（孟子第二）皆所以保民之生業也。

其六。由於封建之廢除也。封建之世。諸國競立。故以戰爭為生存。郡縣之世。英雄無用武之地。故祇以黼黻昇平為事。孔子三百三十一。年。秦始皇用孔子大一統之義。廢封建。以為郡縣。實為大地廢封建之最早者。中國和平學說之獨盛。亦勢使然也。

其七。由於君主之尊崇也。君主尊崇。則征伐自天子出。而國內之爭戰。無所容。且君主雖以馬上得天下。而必以詩書治天下。故歷朝開國而後。偃武修文。投戈講藝。已成慣例。雖其心或以私天下為心。然其實究以保民愛民為事。故中國者。以君主之形式。而行民主之精神者也。又國中儒者。恐君主逞其專制之威。而窮兵黷武。以快其一人之意。而不顧萬民之命。故其反對邊功為最力。

其八由於外患之銷沉也。自孔子二千三百九十一年鴉片戰爭以前，中國向未嘗與歐人開戰，且閉關自守，有天然之藩籬，亦無所謂敵國外患。凡外人之來者，不過通互市，修貢職而已。故中國祇講柔遠之經，並邊防亦不注意。至若勞師襲遠，拓地殖地，民則終古所未聞也。雖以秦始皇之好戰，亦不過築萬里長城以圖自衛，故中國對於外國祇取守勢而不取攻勢，萬里長城其代表也。此亦中國人最愛和平之一大證據也。

其九由於理藩之寬大也。中國之藩屬其地利物宜人，種文化皆不及中國。中國人本以度外視之，而不甚愛惜。若有事於藩屬，則中國每不享其利，而反蒙其害，故割齊民以附夷狄，弊所恃以事無用。漢

書第五十七歷代懸為大戒。是故理藩政策寬大無比。僅為名號之
羈縻。責其朝貢而已。既無貪利其土地人民之心。又無干涉其土地
人民之政。兵禍自無從起。且藩屬畏威懷德。亦樂於託庇而效其恭
順。此亦和平之一大原因也。

其十由於德教之昌明也。此事固以孔教為主。然而孔子以前孔教
以外之學說亦均尚德而不尚兵。蓋中國民族實以和平為其天性。
而孔教不過其代表耳。及孔子以後德教之義益復昌明。此種國性
日益發達。而和平之學說乃愈唱愈高矣。

其十一由於民兵之改變也。中國自古未嘗以兵立國。軍人向來不
能自成一階級。自唐以前舉國皆兵。兵即民。民即兵。其統兵之將帥

亦文武不分。當其治民則為文臣。當其治兵則為武臣。或同時而兼任之。或異時而迭任之。文武兼資。無所謂輕重也。然而治民之官能兼治兵者多。而治兵之官能兼治民者少。且民之數多於兵。治民之官多於治兵。太平之時多於用兵之時。其必至納武備於文事。而重文輕武。亦勢之不得不然者也。至孔子一千二百七十三年。改民兵之制。為募兵之制。凡非被募之民。皆不知兵。兵氣之銷沈已甚。及宋太祖以文臣知州事。孔子一千五百十四年。文益重而武益輕。舉國之政教風俗。皆有厭兵之意。故非無賴子弟。幾不願當兵。然至以無賴子弟為兵。則兵益為人所賤。而益厭之矣。此則民兵廢後之結果也。

以上十一者由和平學說養成之然亦即為和平學說之所從出也
總而論之其屬於天然者則由於地理其屬於人為者則由於孔教
如是而已矣

其屬於天然者則地理統一可以孕育寬和之民族可以成立一統
之大國利於族制之發達宜於農業之特重物產豐繁而無待通商
於故可以有閉關之政地土廣大而無待殖民於外故可以行海禁
之令負山帶海孤立而自雄故並無敵國中國等於天下藩屬同於
夷狄對於藩屬尚不甚愛惜此外各國益不足介意故無所謂外交
更無所用其攻取皆由中國之地土太美而環列皆小蠻夷皆不如
之故自足於己而無所羨於外也

其屬於人為者。則人種雖多。而融合為一種。宗教雖多。而宗主惟一。教家族之維繫。歷變亂而常完。農民之力田。與孝弟而並重。廢封建以歸一統。尊君主以攬大權。對外以柔遠為經。理藩以放任為政。尚德而不用兵。主文而以兼武。凡此皆孔教之產物也。

以上二者。皆和平學說之總原因也。

中國人雖最愛和平。其學說雖亦皆以和平為主。然中國人性質中和。斷不走於極端。故雖尚文而亦戒弱。偃兵而不敢廢兵。主戰之論。雖古今無之。而備戰之說。亦古今有之也。特其所謂備戰者。乃防守而非攻取者耳。此中國人所以為和平之人種也。

學說與時勢為變遷。中國之時勢。其大體為和平之時勢。故其學說

亦皆為和平之學說。然亦間有爭戰之時勢。故其應時勢而起之學說。亦間有論及爭戰者。然雖論戰而不主於戰。其目的皆所以求和平耳。此中國人所以為和平之人種也。

中國人之學說。實可以孔教統括之。蓋前乎孔子者。由孔子集其成。後乎孔子者。由孔子肇其緒。孔子者中國學說之中堅。而為其總代表者也。故此書特以孔教為名。道其實也。雖周秦諸子。亦六經之支與流裔耳。

孔子魯人也。生於魯襄公二十二年。即周靈王二十一年。耶穌前五百五十一年。其先本為殷人。即成湯之後。成湯以武德而為開國之帝王。孔子前一二一五至一二〇三。孔子以文德而為創教之教主。

得天獨厚。夫豈偶然。况其遠祖之契。在唐虞時。孔子前一八〇六至一六五五。已為敷教之司徒。然則主持教化。固為孔子之世業矣。孔子之父叔梁紇。嘗為鄒邑大夫。故孔子雖少孤。又貧且賤。固猶是大夫之子也。至於孔子降生之神瑞。其他姑不具論。但即其名與字而觀之。已可概見。孔子之名曰丘。字曰仲尼。蓋因孔子之父及其母徵在禱於尼上山。而徵在感黑龍之精。以生孔子。故其名字如此取義也。孔子為上帝篤生之聖子。豈不信哉。

孔子降生之時。中國之文明。固已發達完滿矣。而魯尤為文明之心。故孔子所生之時之地。皆足以助孔子之集大成。惟是孔子之時。非天下一統之時。乃列國分爭之時。王綱解紐。五霸迭興。戰爭之禍。

無日無之。蓋封建之弊。至是極矣。且魯國文化雖優。而武力則弱。役於强大。有如藩屬。征伐會盟。常為大國所牽率。而疲於奔命。此皆孔子所目擊之慘禍也。

孔子既為上帝篤生之教主。其賦性本極仁慈。况加以時局之紛爭。若是。則其和平之學說。固所以垂教萬世。亦所以救治當時也。

孔教者孔子所自創之宗教也。其名曰儒。儒字本為有道藝者之通稱。及孔子創教以後。斯為特別之專名矣。孔子以前。所謂儒者。殆出於司徒之官。助人君順陰陽明教化者也。堯舜之時。契為司徒。敬敷五教。使父子有親。君臣有義。夫婦有別。長幼有敘。朋友有信。人倫於以大明。實為儒教之初基。契也者。即孔子之遠祖也。孔子繼承家學。

而創立儒教其亦有所本也哉。

雖然孔子乃一大教主而非僅一儒者故自有孔子而儒之名義與其
實質皆大異於前所云矣前之儒者不過修司徒之遺業守王官之
一職若孔子之儒教則舉自古以來帝王之大經大法無不集合而
發明之故孔子非特繼承契之家學已也實繼承全國歷代之文明
焉祖述堯舜憲章文武且遠紹乎羲農黃帝是故儒教雖創於孔子
而實根本於歷古相傳之道統與治統也此孔教之淵源也
孔子既創儒教及身而已大行故當時有聖人之目而所至之邦必
聞其政又得賢門人七十弟子三千徒侶六萬以後先奔走之故其
教極盛自孔子卒後七十子之徒散游諸侯大者為師傅卿相小者

友教士大夫。或隱而不見。皆以傳教為事。及孔子一百四十五年。魏文侯受經於子夏。是為孔教立為國教之始。三百三十九年。李斯佐始皇以定天下。是為全國奉孔教為國教之始。四百一十二年。漢武帝罷黜百家。表章六經。是為孔教一統之始。自是而後。孔教之為國教。乃至於今日矣。

孔教既承襲歷古之文明。又永為歷代之國教。故中國人之學說。惟孔教足以代表之。蓋孔教之學說。實包括孔子以前及孔子同時之學說。之著於經傳者。因既為孔教所採用。自己成為孔教之一部分。當入之孔教中也。至孔子以後之學說。自七十子以至清儒。皆發揮經義。闡明教旨。其當入之孔教。益不待言矣。特每說皆標其主名。以

示區別耳。

孔教者中國之國性也。若不知中國人之真性質，當於孔教乎觀之矣。是故一言中國，必舉孔教。中國與孔教，殆可為互相替代之名詞。合同而化，不能分而為二者也。

國於天地，必有與立。孔教者中國立國之本，而中國人託命之原也。統觀中國之歷史，其治亂興衰之故，悉視乎孔教之隆替。以為衡孔教而隆，則其時必治必興；孔教而替，則其時必亂必衰。此歷歷不爽者也。

孔教與中國之關係如此。然則孔教之性質果何如乎？孔教之性質，乃世界一特別大宗教，統道德哲學政治藝術而一以貫之者也。世

人習見乎。今之所謂宗教，大率不離乎神道，且多限於神道。遂疑孔教之精深博大，或非宗教之類，而不知孔教固即所謂宗教，特其在宗教之中，乃出類拔萃者耳。

中國之開化最早，五千年前已有庖犧之治。世孔子前二千四百零二年，聖帝明王更迭代興，皆以作君兼作師之任。政蓋教本不分也。及至孔子，以匹夫而為素王，雖無天子之位，而制作聖法，實行天子之事。蓋至是政教始畧分，乃於君統之外，而獨開師統，且於君權之上，而更尊師權。所謂萬世帝王之師，彼歷代君主誠不得不甘拜教主之下風者也。孔子既以匹夫而為素王，故孔子以前聖帝明王之統緒，惟孔子紹之。孔子既為萬世帝王之師，故孔子以後聖君賢相之

事業惟孔子開之。孔教既上承政教，不分之統；又下開政教，不分之治。故孔教勢力之偉大，誠非專言神道之宗教所能比擬。此不可不知者也。

孔教既為宗教，自具一種宗教之勢力，以範圍乎人心。中國人對之，自如帝如天，以為神聖不可侵犯。凡聖經之所垂訓，視同日月之著明，尊信奉行，無敢非議。而聖訓之所昭示，亦實有以明天道之自然。著事理之當然，合於人心之所同然。循之則治而安，違之則危而亂。效著彰著，切於實用，故世人尊信之忱，實較各教而上之。蓋各教多涉於虛無，而孔教多見諸實事也。

中國人對於孔教，固尊之信之，奉若天書。然此非各教之迷信比。

也。孔教之見重於人，乃在人道而非在神道。蓋孔教雖兼言神道，而其歸實納之人道之中，是故孔子曰：「道不遠人。」人之為道而遠人，不可以為道。禮記中庸而世人之尊信孔教，遂若布帛菽粟之不可離，其信奉之也，非有所迷信而盲從之也。乃實見其切於人事而不可須臾離也。是故各教之信仰，出於感情，而孔教之信仰，出於智慧。其學愈博，其問愈審，其思愈慎，其辨愈明，則其信孔教也愈堅，而行孔教也愈篤。蓋孔教者，以宗教而兼科學之性質者也。

孔教既主於人道，故於個人之修養、家庭之和樂、社會之交接、國家之治安、世界之和平，莫不垂為教條，以資信守。蓋孔教者，政教合一，以宗教為體，而以政治為用者也。是故孔子非空言之宗教家，乃實

行之宗教家。至其何以能見諸實行。則有待於政治。是故孔子曰。苟
有用我者。期月而已可也。三年有成。又曰。如有用我者。吾其為東周
手。第論語三十七。乃至諸門弟子。亦或長於治兵。或長於理財。或長
於外交。無不可以從政。而顏淵之問為邦。仲弓之可南面。尤有帝王
之資格焉。固不獨孔子若得百里之地而君之。能以朝諸侯有天下
也。孟子第三是故孔子乃混合政治之宗教家。而非脫離政治之宗
教家。其後道既不行。手無政柄。乃不得已作為六經。垂之萬世。其始
固非欲以空文傳後者也。然而六經之文。大率以施於政治為主。其
所具之効力。實有宰治人心之作用。國人之尊信奉行。且較國家之
條教號令而上之。蓋六經者國家條教號令之所從出。固非紙上空

文已也。是故孔教之徒必當通經。通經之士必當致用。不能致用者不足為通經。不能通經者不足為孔教徒。誠哉孔教之為政治宗教也。

本書之意在發揮孔教之和平學說。至其他學說之有關係於和平者則連類及之。並非以本書而盡列孔教之各種學說也。本書所最注意者為孔子之國際法。其取材多出於春秋。蓋春秋固為禮義之大宗。無所不包。然其於國家之交際尤為詳備也。春秋之義以公羊為主。而輔之以穀梁。至於左傳之事實亦間取之。蓋雖重經義亦兼明史事也。

本書之意以消弭各國之戰爭。促進世界之和平為宗旨。故所標舉


之義理。本以救治現在及將來為歸。雖道與時為變通。古義亦有不盡適宜於今與後之處。然畧迹而原意。則其根本大義。固萬古常新也。苟讀者不以文害辭。不以辭害志^意。以意逆志。則大善矣。至其必不適於用而仍存之者。則不過以備考古之資而已。

本書所最注重者為經義。本其經傳本文明白。無待解釋者。固完全為孔子及七十子之學說。若必待解釋而後明者。則取自漢迄清諸儒之說。以附入之。故此書實合數千年之學說於一爐也。然雖取諸儒之說。仍不過以發明經義為主。故是書名曰孔教經世法也。

歷代諸儒之說。既分條而附入經義中矣。又有其說雖亦源本於經義。而可以代表當時之學說者。則斷代列之。藉以略明一代之學說。

也。

周秦諸子本六經之支流釋道兩門亦儒宗之附屬特以其別立門戶故使之自為一編畢收孔門以外之精言以盡中國各家之學說窮其旨趣均在和平斯亦孔教之庸而本附書所不遺者也分而列之而中國人之和平學說其大畧乃可全觀矣。



卷第二 孔教總義

一元

元者春秋之始也。孔子曰：「上作春秋，始於元，終於麟，王道成也。」春秋緯元命苞：「孔子萬法皆本於氣化之自然，故春秋以元為始。」吾今首明元義者，即竊取此意也。

公羊何注曰：「元者氣也，無形以起，有形以分，造起天地，天地之始也。蓋無形以起，在天成象；有形以分，在地成形。天地皆一元之所生也。故曰：『天地之始也。』」易曰：「大哉乾元，萬物資始，乃統天。」繫辭曰：「易有太極，是生兩儀。」禮運曰：「夫禮必本於大，一分而為天地，變而為陰陽，三統由曆曰：『太極元氣，函三為一，三者三才。』」天地人，一即太極元氣也。

春秋繁露曰春秋變一謂之元元猶原也其義以隨天地終始也故人唯有終始也而生不必應四時之變故元者為萬物之本而人之元在焉安在乎乃在乎天地之前第十三蓋元者氣泉萬物之原人與天地共為三才皆起於一氣泉之中從其後而言之則天地者萬物之本先祖之所出也從其先而言之則天地為元氣所生人亦為元氣所生人之元實在天地之前此大人之所以能先天而弗違也

易文言

衛宏古文奇字曰无通於元蓋元也者無形體者也人之生也本於元其死也歸於元故祭獻之禮以嘉魂魄是謂合莫禮運莫者虛無寂莫即元氣也亦即死者精神所寄也生者行祭獻之禮以嘉善死

者之魂魄而神來歆饗是合莫之道也。孝經緯曰：上通元莫，言人之精靈所感，上通元氣寂寞也。此人於既生之後，未死之前，所以能與元氣相通也。

中庸曰：子曰：聲色之於以化民，末也。詩曰：德輶如毛，毛猶有倫。上天之載，無聲無臭，至矣。無聲無臭者，即所謂元也。公羊何注曰：德合元者，稱皇。成公八年：此則化民而不以聲色者也。

雖然，元之為物，固無形體矣。王者將欲繼天奉元，養成萬物，宜何道之從？易文言曰：元者善之長也。君子體仁足以長人，然則體元之功，即體仁是矣。蓋離人事而言則曰元，就人事而言則曰仁，此徹上徹下，統括天地人物，通生死，合有無，一理氣之道也。生生之本，萬化之

原孔教之微非元其孰能當之故春秋之義以元統天以天統君以君統民

二 天

春秋以春次元即以天次元之義也春秋緯說題辭曰天之為言顛也居高理下為人經緯故其字一大以鎮之此天之名義也天之與帝兩字通用故孔子曰帝者天稱也又曰王用享于帝者言祭天也易緯乾鑿度此天與帝同一之證也

天既與帝同一何以天之上復有元以統之乎豈上帝之外更有大於上帝者乎曰天之與元二而一一而二者也春秋緯說題辭曰羣陽精也合為太乙分為殊名故立字一大為天又曰元精氣以為天

渾沌無形體。此天與元同一之證也。太乙者即禮運之大一也。就氣
化言之。則謂之元。就主宰言之。則謂之天。謂之上帝。太乙者可以元
解之。可以天解之。可以上帝解之。包含此三義也。天字固最活動矣。
即上帝二字。亦有獨一之上帝。有五天之上帝。隨所指而不同。蓋就
其分者言之。則有諸天諸帝。就其合者言之。則一元而已矣。元固可
以統諸天諸帝。若一大為天。及昊天上帝。則與元同一而異名。何相
統之有。然孔子猶以元統天者。則以元者氣也。氣為天之始。亦為天
之本。無氣則天不能成其化。故元可統天也。孔子以氣為天地之始。
而不直名之曰上帝。此孔子之教。所以為出於自然也。

穀梁傳曰。獨陰不生。獨陽不生。獨天不生。三合然後生。故曰母之子。

可^也天之子也可尊者取尊稱焉卑者取卑稱焉莊公三年此明凡人皆天與父母三合然後生也是故白虎通曰人皆天所生也託父母氣而生耳春秋繁露亦曰無天而生未之有也天者萬物之祖萬物非天不生獨陰不生獨陽不生陰陽與天地參然後生第七十此孔子隸人於天以天為父之大義也平等博愛獨立自由諸義之所從出也特社會不能無組織有組織則不能無尊卑故天子之實雖盡人皆有而天子之名惟最尊者得稱此所謂事理之宜也中庸曰天命之謂性率性之謂道脩道之謂教然則凡人之性皆天所命也道與教皆從性出亦即天所命也故無一而非天也穀梁傳曰人之於天也以道受命於人也以言受命不若於道者天

絕之也不若於言者人絕之也。臣子大受命。莊公元年。臣子大受命者。大其所受於天人之命也。受命於天。及受命於人。二者一而已矣。不若於道。即不若於言。惟若於道。然後若於言。苟不若於道之事。雖臣子受命於其君父。亦不得以若於言視之。蓋天人合一之理。以天為主也。故穀梁傳又曰。為天下主者天也。宣公十五年。此明明以天為天下萬物之主宰者也。

凡孔子之王法。稱天而行。所謂承天以制號令也。其違法者。謂之無天。無天者是無天而行也。春秋謂文無天者。以文公於二年八月大。事于大廟。躋僖公於閔公之上也。夫僖於閔為兄。於文為父。親也。然閔於僖為君。於文為祖。尊也。君子不以親親害尊尊。此天之正理。而

春秋之通義也。今文公先親後祖，是逆祀也。逆祀是無昭穆也。無昭穆是無祖也。無祖則無天也。故曰文無天。此春秋所以於文公五年，榮叔及二召伯二王使皆不稱天王，特去天字，以見文之無天而行也。
穀梁傳

三王

孔子之治法，以一統之。故孔子曰：天無二日，土無二王，家無二主，尊無二上。示民有君臣之別也。禮記坊記春秋著大一統之義。公羊傳隱公元年孟子亦言天下定于一。第二蓋分則爭，一則定。欲天下之和平而無戰爭，莫善於天下一統矣。由大一統之義，則自公侯至於於庶人，自山川至於草木昆蟲，莫不一一統於天下所共推之王。而王

乃總政教之柄。凡天地人物無所不統矣。孔子曰：一貫三為王。說文卷二：三者天地人也。孟子曰：以德行仁者王。又曰：行一不義，殺一不辜，而得天下，不為。第三：蓋天下所歸往謂之王。王固無一毫利天下之心。凡力征經營智取術馭皆所不用，而惟以德教服人。此孔教之所謂王也。蓋以教主而兼君主者也。

孔子之所謂王，既以教主而兼君主，故春秋雖以稱王而不加天為正稱。公羊傳注：隱公元年，僖公二十八年，然亦稱曰天王。又曰：天子，天子者爵稱也。天佑而子之，號稱天子，明以爵事天也。其時王或悖天道，或失禮義，春秋則不言天王，而但稱曰王，去天字以貶之。公羊傳注：莊公元年，文公五年，若天王犯大罪，且或出而絕之。僖公二十

四年此可見孔子之所謂王資格最高非尋常帝王所可冒混其居
王位而有失德亦受孔子匹夫之貶斥並無絕對之尊所謂天子不
過爵號而已天命靡常視民意為轉移天視自民視天聽自民聽故
得乎上民而為天子天子_下歸往則謂之王若夫民心已失則天命已
傾昔為天子今為獨夫固無所謂神權也亦無所謂神聖不可侵犯
春秋繁露曰天之生民非為王也而天立王以為民也故其德足以
安樂民者天子之其惡足以賊害民者天奪之第二十五故孔子之
所謂王以德為本以民為徵以天為號實合政教而一之凡不涉政
治之宗教有位無德之帝王皆_非孔子之所謂王也
論王之資格最詳者莫如春秋繁露第三十五其言曰深察王號之

大意其中有五科。皇科、方科、匡科、黃科、往科。合此五科以一言謂之。王王者皇也。王者方也。王者匡也。王者黃也。王者往也。是故王意不。普大皇則道不能正直而方。道不能正直而方則德不能匡運周徧。德不匡運周徧則美不能黃。美不能黃則四方不能往。四方不能往則不全於王。故曰天覆無外地載兼愛風行令而一其威雨布施而均其德。王術之謂也。

尤有進者孔子之所謂王乃天下之共主而非一國之王。故曰王者無外。公羊傳隱公元年在昔大地未通其有豐功碩德能統治其時之所謂天下而並無他國與之抗者其稱之為王可也。若今日則大地既通諸國競立未至世界一統之時何有四方歸往之王。以此言

之孔子之所謂王非既往之王亦非現在之王當視為理想中未來之王耳

春秋開宗明義首書元年春王正月公羊傳曰王者孰謂謂文王也何注云文王周始受命之王方陳受命制正月故假以為王法不言諡者法其生不法其死與後王共之人道之始也論語記孔子之言曰文王既没文不在茲乎第九然則孔子固自認為文王之承繼者矣故其所作春秋不用時王之正月而假託之於六百年前受命開創之文王又不言其諡不曰文王而但曰王以明法生不法死與後王共之之義然則春秋之所謂王由春秋之前言之則託之於文王由春秋之後言之則通之於後王由其時言之則孔子實為受命制

法之王。故春秋繁露曰：春秋應天作新王之事。第二十三。孟子亦曰：春秋天子之事也。第六。人道之始者，言孔子繼天奉元，改制創教，以作新王，實為人道之始也。人道教以孔子為始，異於神道教也。吾今敢直下斷語曰：孔子之所謂王，實即孔子之自道。故鄭玄六藝論云：孔子既西狩獲麟，自號素王。左傳序孔疏：凡堯舜文王皆孔子之代表也。孔子制春秋之義，以俟後聖。苟後聖有作，奉孔教以一統天下，撥亂世反諸正，而致天下於太平世，使人人有士君子之行，刑措不用，而兵益無所用之，則庶乎孔子之所謂王矣。孔子曰：如有王者，必世而後仁。論語第十三。其諸以三十年為其化成之日歟。荀子曰：天地者生之始也。禮義者治之始也。君子者禮義之始也。故

天地生君子。君子理天地。君子者天地之參也。萬物之媿摠也。民之
父母也。無君子則天地不理。禮義無統。上無君師。下無父子。夫是之
謂至亂。君臣父子兄弟夫婦始則終。終則始。與天地同理。與萬世同
久。夫是之謂大本。故喪祭朝聘師旅一也。貴賤殺生與奪一也。君君
臣臣父父子子兄弟第一也。農農士士工工商商一也。第九荀子
所謂君子。即春秋所謂王。皆指孔子也。禮義之始。即所謂人道之始
也。

四 五始

政莫大於正始。故春秋以元年春王正月公即位立五始之義。元者
氣也。天地之始也。春者天地開辟之端。養生之首。法象所出。四時之

始也。王者人道之始。正月者政教之始。公即位者一國之始也。春秋以元之氣正天之端。以天之端正王之政。以王之政正諸侯之即位。以諸侯之即位正竟內之治。諸侯不上奉王之政。則不得即位。故先言正月而後言即位。政不由王出。則不得為政。故先言王而後言正月。王者不承天以制號令。則無法。故先言春而後言王。天不深正其元。則不能成其化。故先言元而後言春。五者同日並見。相須成體。乃天人之大本。萬物之所繫。不可不察也。蓋即位之日。即布政。布政即以奉王。奉王即以奉天。奉天即以體元。所謂同日並見。相須成體也。元年春者天之大本也。王正月公即位者人之大本也。自公侯至庶人。自山川至草木昆蟲。莫不一一繫於正月。故為萬物之所繫也。公

羊傳注隱公元年

五 五常

中庸曰天命之謂性性者生之質也天有五氣萬物化成木氣則仁金氣則義火氣則禮水氣則智土氣則信人得五氣以為五性皆天所命是謂性命五氣盡純聖德備矣然人皆有之無間聖狂故曰五常仁義禮智信是也故禮運曰人者其天地之德陰陽之交鬼神之會五行之秀氣也

仁者不忍者也施生愛人也義者宜也斷決得中也禮者履也履道成文也智者知也獨見前聞不惑於事見微知著也信者誠也專一不移也若以之配五藏則肝主仁肺主義心主禮腎主智脾主信也

白虎通

五常之道本無軒輊然生生之本尤在於仁仁也者統四端而兼萬善者也故孔子以仁為主也

六 七情

靜存則為性動發則為情五性之動發為七情則禮所謂喜怒哀懼愛惡欲七者弗學而能是也然情雖有七而其實則二端而已欲之甚則愛欲之得則喜欲之不得則哀皆欲之屬也惡之甚則怒惡之不得則懼皆惡之屬也故禮運又曰欲惡者心之大端也

孔子之教以人道為主故必本於人情孔子曰道不遠人人之為道而遠人不可以為道禮記中庸此言道之在人也道在於人從何表

見則人情是己。人情之實，即禮義之經也。非從天降也，非從地出也。人情而已矣。禮記問喪故曰：人情者，聖王之田也。禮義由人情出，而還以治人情。此孔教所以為達天道而順人情之大道也。禮記禮運

七 五倫

孔子曰：天下之達道五，所以行之者三。曰君臣也，父子也，夫婦也，昆弟也，朋友之交也。五者天下之達道也。知仁勇三者，天下之達德也。所以行之者一也。一者誠也。惟誠然後可行。三達德，惟三達德然後可行。五達道，故曰誠者，物之終始。不誠無物。又曰：好學近乎知，力行近乎仁，知恥近乎勇。禮記中庸此孔教之大綱也。五達道者，即所謂五倫也。孟子曰：契為司徒，教以人倫。父子有親，君臣有義，夫婦有別。

長幼有敘朋友有信第五此五倫之道也

孔教以君臣一倫與四倫並重所謂君者非徒國君之謂也凡同事者皆可名曰君臣也主其事者謂之君輔而行之者謂之臣凡商店之東夥官僚之堂屬皆君臣之倫也左傳曰王臣公公臣大夫大夫臣士士臣阜阜臣興興臣隸隸臣僚僚臣僕僕臣臺昭公七年蓋人無貴賤惟以其相統屬者為君臣雖以阜隸之卑而皆可以為君皆可以有臣故君臣之倫無可廢者也不以君主民主之國體而異者也故曰天下之達道也

白虎通曰人本接朋結友為欲立身揚名也朋友之道有四焉通財不在其中近則正之遠則稱之樂則思之患則死之此朋友之道也

父子兄弟君臣夫婦。吾將於下文分論之。惟朋友之道。既不專論。故特附於此。

八 三綱

凡三綱之道。乃人道之當然。社會組織中之天然條理也。三綱之名。固不出於孔子之口。然其道實為孔子所發明。或亦為孔子之口說。未可知也。但三綱之義。為道之不得不然。誠使社會而無組織。則已既無組織。則人人單獨而孤立。散亂而無紀。何須乎綱哉。若猶不能不有組織也。則三綱之義。不可廢也。夫三綱者。非不平等者也。非不自由者也。吾今且舉孔子之言三綱者。以張吾說。

孔子侍坐於哀公。哀公曰。敢問人道誰為大。孔子愀然作色而對曰。

君之及此言也。百姓之德也。固臣敢無辭而對。人道政為大。公曰。敢問何謂為政。孔子對曰。政者正也。君為政正則百姓從政矣。君之所為。百姓之所從也。君所不為。百姓何從。公曰。敢問為政如之何。孔子對曰。夫婦別。父子親。君臣嚴。三者正則庶物從之矣。

公曰。寡人雖無似也。願聞所以行三言之道。可得聞乎。孔子對曰。古之為政。愛人為大。所以治。愛人禮為大。所以治。禮敬為大。敬之至矣。大昏為大。大昏至矣。大昏既至。冕而親迎。親之也。親之也者。親之也。是故君子興敬為親。舍敬是遺親也。弗愛不親。弗敬不正。愛與敬。其政之本與。

公曰。寡人願有言然。冕而親迎。不已重乎。孔子愀然作色而對曰。合

二姓之好以繼先聖之後以為天地宗廟社稷之主君何謂已重乎
公曰寡人固不固焉得聞此言也寡人欲問不得其辭請少進孔子
曰天地不合萬物不生大昏萬世之嗣也君何謂已重焉孔子遂言
曰內以治宗廟之禮足以配天地之神明出以治直言之禮足以立
上下之敬物耻足以振之國耻足以興之為政先禮禮其政之本與
孔子遂言曰昔三代明王之政必敬其妻子也有道妻也者親之主
也敢不敬與子也者親之後也敢不敬與君子無不敬也敬身為大
身也者親之枝也敢不敬與不能敬其身是傷其親傷其親是傷其
本傷其本枝從而亡三者百姓之象也身以及身子以及子妃以及
妃君行此三者則愾乎天下矣大王之道也如此則國家順矣禮記

哀公問

人道莫大於政、政莫大於三綱、夫婦別、父子親、君臣嚴、則三綱之謂也、三者正則庶物從之矣、

人道以夫婦為始、故孔子之言三綱、首舉夫婦、夫夫為妻綱、疑若夫尊而妻卑矣、然孔子則以愛敬為政之本、特舉寬而親迎以明之、蓋夫也者、必當愛其妻、而後夫妻始親也、必當敬其妻、而後夫妻始正也、是故內足以治宗廟、配天地、外足以出政教、立上下、乃至臣恥足以振之、君恥足以興之、皆夫婦之禮為之本也、此夫為妻綱之無損於妻者也、

夫夫妻敵體、其當敬其妻、猶易明也、若夫子所生父、又為子綱、何以

猶必當敬之乎。孔子曰：子也者，親之後也，敢不敬與？此明以敬其子者之有道也。孝經載孔子之言曰：治家者不敢失於臣妾，而況於妻子乎？故得人之懽心，以事其親，此言凡有妻子者之必當敬之而得其懽心也。夫以父之尊，以父之親，對於其子，疑若可以無庸介意矣。乃孔子猶以為有必敬其子之道，然則父為子綱，又何損於子矣。孔子今雖未論君敬臣之道，而於他處論之，然其義則比君敬臣為更進而包括之也。蓋百姓者，疏遠於臣者也。今自愛敬其身，以及百姓之身，自愛敬其子，以及百姓之子，自愛敬其妃，以及百姓之妃，更何論於臣之身與妻子乎？安有不先愛敬之者乎？是可不言而喻也。然則君為臣綱，亦何損於臣矣。

要而言之。孔子最重恕道。身以及身。子以及子。妃以及妃。此所謂恕也。能行此三者。則愾乎天下。則國家順。言恕之可以平天下也。夫夫之愛敬其妻。父之愛敬其子。君之愛敬其臣。亦即恕道也。若為夫父君者。徒望妻子臣之報而已。無所施之。豈理也哉。

孔子曰。忠恕違道不遠。施諸己而不願。亦勿施於人。君子之道四。上未能一焉。所求乎子。以事父未能也。所求乎臣。以事君未能也。所求乎弟。以事兄未能也。所求乎朋友。先施之未能也。禮記中庸然則五倫之間。惟有相率以行恕道可矣。孔子今雖未言夫婦。然可由子臣弟友推之也。所求乎子。固以之事父矣。然待子之道。亦不敢不盡焉。所求乎臣。固以之事君矣。然待臣之道。亦不敢不盡焉。所求乎弟。固以

之事兄矣。然待弟之道，亦不敢不盡焉。至於所求乎朋友，所求乎妻，則先施之尚矣。凡此所謂^皆恕道也。

論語曰：君君臣臣，父父子子。易曰：父父子子，兄兄弟弟，夫夫婦婦。然則五倫之中，安有不平等之事哉？然臣之不能先君，子之不能先父，弟之不能先兄，婦之不能先夫，亦天然之秩序也。故不曰臣君而曰君臣，不曰子父而曰父子，不曰弟兄而曰兄弟，不曰婦夫而曰夫婦。蓋言必如是然後順也。夫不以言之分先後而不平等，豈以其分綱目而遂不平等哉？蓋平等云者，非廢三綱之謂也。三綱亦無碍於平等之義者也。

然則何以必立三綱也？曰：此所謂天然之社會組織法也。非聖人之

以意創造者也。一君而多臣，一父而多子，一夫而或前後所娶不止一妻，或有妾媵，且雖僅一妻，而夫妻不同姓，故以君統臣，以父統子，以夫統妻，實勢之不得不然者也。此禮緯含文嘉所以謂君為臣綱，父為子綱，夫為妻綱也。綱與目相對，以一綱統眾目，斯亦事理之當然者矣。孔子曰：天無二日，土無二王，家無二主尊無二上。禮記坊記以一治之也。禮記喪服四制

白虎通曰：君臣父子夫婦六人也，所以稱三綱何？一陰一陽謂之道，陽得陰而成，陰得陽而序，剛柔相配，故六人為三綱。春秋繁露曰：凡物必有合，陰者陽之合，妻者夫之合，子者父之合，臣者君之合，物莫無合，而合各有陰陽，陽兼於陰，陰兼於陽，夫兼於妻，妻兼於夫，父

兼於子。子兼於父。君兼於臣。臣兼於君。君臣父子夫婦之義。皆與諸陰陽之道。君為陽。臣為陰。父為陽。子為陰。夫為陽。妻為陰。陰道無所獨行。其始也不得專起。其終也不得分功。有所兼之義。是故臣兼功於君。子兼功於父。妻兼功於夫。陰兼功於陽。地兼功於天。是故仁義制度之數。盡取之天。天為君而覆露之。地為臣而持載之。陽為夫而生之。陰為婦而助之。春為父而生之。夏為子而養之。王道之三綱。可求於天。第五十三。此三綱之義也。君父夫為陽。而臣子妻為陰。此所以六人而止。稱三綱也。猶天數五。地數五。天地數十。而位止五。故繫辭曰。五位相得而各有合也。春秋繁露謂夫兼於妻。妻兼於夫。父兼於子。子兼於父。君兼於臣。臣兼於君。是則三綱之平等。可以見矣。

春秋繁露曰天子受命於天諸侯受命於天子子受命於父臣妾受命於君妻受命於夫諸所受命者其尊皆天也雖謂受命於天亦可天子不能奉天之命則廢而稱公王者之後是也公侯不能奉天子之命則名絕而不得就位衛侯朔是也子不奉父命則有伯討之罪衛世子蒯聵是也臣不奉君命雖善以叛言晉趙鞅入於晉陽以叛是也妾不奉君命則媵女先至者是也妻不奉夫之命則絕夫不言及是也曰不奉順於天者其罪如此第七十春秋繁露又曰脅嚴社而不為不敬靈出天王而不為不尊上辭父之命而不為不承親絕母之屬而不為不孝慈義矣夫第五此皆重本尊統使尊行於卑上行於下之義也即三綱之義也

三綱之外。又有六紀。六紀謂諸父有善。諸舅有義。族人有序。昆弟有
親。師長有尊。朋友有舊也。六紀者為三綱之紀者也。師者所以教人
為君者也。長者所以教人為長者也。師長皆以成己。故師長君臣之
紀也。諸父兄弟及族人。父子之緼紀也。以其有親恩連也。諸舅朋友
夫婦之紀也。以其皆有同志為己助也。（白虎通）

綱者張也。紀者理也。大者為綱。小者為紀。所以張理上下。整齊人道
也。人皆懷五常之性。有親愛之心。是以綱紀為化。若羅網之有紀綱
而萬目張也。（白虎通）

凡家庭處變之道。妻得殺不孝之夫。而子不得誅弑父之母。蓋夫妻
敵體。且以義合。故得討不義。子為母生。至親也。至親與至尊並。故但

當推逐去之。不可加誅。此誅不加上之義也。然弑父之母。義當絕之。不絕則忘父背本之道。故春秋不與莊公念母也。若殺子之母。其罪差輕於殺夫。則義不得以子絕母。蓋子不得以兄弟之故而絕其母也。故春秋不於哀姜之出奔而即貶之。又哀姜雖被討而閔公不書葬。不以討母葬子也。至於子受祖命。雖義得拒父。然不可以子誅父。故雖弑祖之父。子亦不得殺之。蓋父子之親。天性也。父雖不孝於祖。子不可不孝於父。惟除子以外。皆得殺弑父之人。故檀弓云。子弑父。凡在宮者。殺無赦也。然此皆就家庭之倫理言之。以明夫婦父子母子祖孫處變之義耳。若以王法言之。則殺人者死。雖父殺其子。猶不免於當誅。蓋天地之性。人為貴。人皆天所生也。託父母氣而生耳。故

父不得專也。况母之殺子，焉得免於誅乎？至弑夫弑父之為逆，倫重案者，益無論矣。公羊傳注莊公元年閔公二年，哀公三年穀梁傳閔公二年禮記檀弓疏白虎通。

凡君與父母比較，則父母尤重。伍子胥父誅乎楚，挾弓而去楚，以干闔廬、闔廬為之興師而復讎于楚。定公四年吳楚戰于柏莒，楚師敗績。公羊傳曰：「事君猶事父也。」此其為可以復讎奈何？曰：父不受誅，子復讎可也。何注曰：「孝經曰：資於事父以事君而敬同。」本取事父之敬以事君，而父以無罪為君所殺，諸侯之君與王者異於義得去。君臣已絕，故可也。孝經云：「資於事父以事母。」莊公不得報讎，文姜者，母所生，雖輕於父，重於君也。易曰：「天地之大德曰生，故得絕不得殺。」據此。

言之則母輕於父而重於君而父又重於母然則父母皆重於君矣

九 平等

凡人類平等天下無生而貴者故王者太子不過稱士諸侯世子雖世其國未賜爵僅視天子之元士以君其國郊特牲王制明人有賢行著德乃得貴也

君子二字其始為有爵位者之稱後兼為有道德者之稱天子至庶民皆通稱之故詩云愷悌君子民之父母謂成王也論語曰君子哉若人謂子賤也百虎通此以道德之尊代爵位之貴使全世界皆歸於平等者也

孔子立士君子以為人格故春秋之義始於麤麤終於精微教化流

行德澤大洽天下之人人有士君子之行而少過春秋繁露第十七
定哀之間文致太平無所復譏唯譏二名公羊傳定公六年即此意
也禮經祇制士禮不制庶人禮故曲禮曰禮不下庶人以庶人遽於
事且貧不能備物故有事則假士禮以行欲勉民使至於士也百虎
通故士也者社會之本位也亦人格之本位也雖有庶人亦以士為
鵠也

孔子之教無所不統故春秋上刺王公下譏卿大夫而逮士庶人公
羊傳注隱公元年蓋凡屬人類孔子均以平等視之使受治於其教
孔子固非專為上流社會制法者也

曲禮曰國君不名卿老世婦大夫不名世臣姪娣士不名家相長妾

穀梁傳曰子既死父不忍稱其名臣既死君不忍稱其名桓公二年凡此皆人權平等之義也

凡人權獨立之義於春秋之書君臣同名見之昭公元年郭之會春秋錄衛齊惡七年又錄衛侯惡卒穀梁傳曰鄉曰衛齊惡今日衛侯惡此何為君臣同名也君子不奪人名不奪人親之所名重其所以來也王父名子也蓋父受命於王父而名之王父卒則稱王父之命名之臣之子本不敢與世子同名然既生在世子前王父已名之者則因而不改臣雖欲改君亦不當聽之所以使人人得各尊其父命以明人人皆各有獨立權也

春秋三世之義有所謂亂世有所謂升平世有所謂太平世亂世者以所傳聞之世代表之謂高祖曾祖時事也其在春秋則隱桓莊閔僖五公之年也升平世者以所聞之世代表之謂王父時事也其在春秋則文宣成襄四公之年也太平世者以所見之世代表之謂己與父時事也其在春秋則昭定哀三公之年也

隱公元年公羊傳曰所見異辭所傳聞異辭異辭者見恩有厚薄義有淺深也時恩衰義缺孔子將以理人倫序人類因制治亂之法故於所見之世恩已與父之臣尤深大夫卒有罪無罪皆日錄之如隱如逐君而春秋於定公五年書曰六月丙申季孫隱如卒是也於所聞之世王父之臣恩少殺大夫卒無罪者日錄有罪者

不日略之。如得臣知賊不言。春秋於宣公五年書曰九月叔孫得臣卒者也。於所傳聞之世。高祖曾祖之臣恩淺。大夫卒有罪無罪皆不日略之。隱公元年公子益師卒無罪之而不日。隱公八年無駭卒有始滅之罪而不日。是也。

春秋於所傳聞之世見治起於衰亂之中。用心尚麤。猶故內其國而外諸夏。先詳內而後治外。錄小大略小。內小惡書。外小惡不書。大國有大夫小國略稱人。內離會書。外離會不書。是也。於所聞之世見治升平。內諸夏而外夷狄。書外離會。小國有大夫。宣公十一年秋晉侯會狄于攢函。襄公二十三年邾婁鼻我來奔。是也。至所見之世著治太平。夷狄進至於爵。天下遠近小大若一。用心尤深而詳。故崇仁義。

譏二名定公六年譏仲孫何忌哀公十三年譏晉魏曼多是也公羊傳注隱公元年

夫立愛自親始故三世之異先內而後外先近而後遠先諸夏而後夷狄此用愛之等也亦進化之序也起於襄亂中於升平終於太平此所謂進化也而一切義理制度悉隨三世為遷移矣故孟子謂孔子聖之時者也^{第七}三世之相視固各異即一世之中亦自異故三世可推為九世二十七世八十一世二百四十三世以至無窮蓋道與時為變通夏葛冬裘不能執一故孔教之道實兼進取與保守而有之不主於一偏也以時期言之則有先後之三世蓋前為衰亂今為升平而後為太平也以地域言之又有同時之三世蓋甲地衰亂乙地

升平而兩地或太平也。合而觀之，則其道各不同，甚或相反焉。然而其趨一也。一者何也？曰仁也。孔教亦仁而已矣。三世之義，則所以善用其仁而無碍者也。吾故曰孔教教之時者也。

孔子之志在天下為公，傳賢不傳子，故尚書始自堯舜，春秋終於堯舜，尊其公天下也。孔子曰：後世雖有作者，虞帝弗可及也。已君天下，生無私，死不厚其子，子民如父母，有憐恤之愛，有忠利之教，親而尊，安而敬，威而愛，富而有禮，惠而能散，其君子尊仁畏義，恥費輕實，忠而不犯義，而順文而靜，寬而有辨。甫刑曰：德威惟威，德明惟明，非虞帝其孰能如此乎？禮記表記：此推崇虞帝之至者也。是故子謂韶盡美矣，又盡善也；謂武盡美矣，未盡善也。論語第三：此揖讓與征誅之

別即傳賢與傳子之別也。湯為孔子之祖，故孔子譏武王而不及湯。為祖諱也。然孔子尊傳賢而薄傳子，尤為莫著於禮運大同小康之論。

孔子曰：大道之行也，與三代之英，上未之逮也，而有志焉。大道之行也，天下為公，選賢與能，講信修睦，故人不獨親其親，不獨子其子，使老有所終，壯有所用，幼有所長，矜寡孤獨廢疾者，皆有所養。男有分，女有歸，貨惡其棄於地也，不必藏於己；力惡其不出於身也，不必為己。是故謀閉而不興，盜竊亂賊而不作，故外戶而不閉，是謂大同。今大道既隱，天下為家，各親其親，各子其子，貨力為己，大人世及以為禮，城郭溝池以為固，禮義以為紀，以正君臣，以篤父子，以睦兄弟，

以和夫婦以設制度以立田里以賢勇知以功為己故謀用是作而
兵由此起禹湯文武成王周公由此其選也此六君子者未有不謹
於禮者也以著其義以考其信著有過刑仁講讓示民有常如有不
由此者在執者去眾以為殃是謂小康

此兩節為孔子最重要之遺言必比較而互勘之乃得其真意其主
眼即在天下為公天下為家八字選賢與能講信脩睦天下為公之
實也各親其親各子其子貨力為己大人世及以為禮城郭溝池以
為固天下為家之實也故人不獨親其親不獨子其子使老有所終
壯有所用幼有所長矜寡孤獨廢疾者皆有所養男有分女有歸貨
惡其棄於地也不必藏於己力惡其不出於身也不必為己此公天下

之成效也。禮義以為紀，以正君臣，以篤父子，以睦兄弟，以和夫婦，以設制度，以立田里，以賢勇知，以功為己。此家天下之成效，極於是矣。然而公天下之成效，可至於謀閉不興，盜竊亂賊不作，外戶不閉，是真所謂大同矣。若家天下之成效，則無論其禮義倫紀制度之如何，而既以勇知為賢，以為己立功，則謀用是作，而兵由此起，此亦家天下者必至之勢也。惟禹湯文武成王周公，此六君子者，以謹於禮為主，以行仁義禮知信五常之德，而示之於民，尚得號為小康。若一旦不由禮義，則其子孫雖在世及之，執位眾亦以為殃而去之矣。家天下者，必不能長治久安，以為子孫帝王萬世之業也。

小康之世，固有君臣父子兄弟夫婦大同之世，亦有君臣父子兄弟

夫婦惟公天下者。帥天下以公。而天下以公應之。故貨力不為己謀。不興而亂不作。家天下者。帥天下以私。而天下以私應之。故貨力為己謀。作而兵起。其源流之別。皆在公私之間而已。大同之世。亦不能不正君臣。不然。則選賢與能。何以位之。講信修睦。將孰任之。未有選人而無可居之位。睦鄰而無負責之人者也。大同之世。亦不能不篤父子。蓋親其親。以及人之親。故曰不獨親其親。子其子。以及人之子。故曰不獨子其子。其親其子。名義具在。即施由親始。亦何嘗有害於天下為公。不然。雖日日謂他人親。謂他人子。而無源之水。無本之木。終不能發生耳。白虎通喪服篇曰。天子諸侯絕期月者何。示同愛百姓。明不獨親其親也。然則所謂不獨親其親者。博愛之謂耳。豈無父

子之謂哉。有父子即有兄弟。父子當篤。即兄弟當睦。此可不煩言而解也。夫婦之倫。為人倫所自起。然大同之世。亦不能不和夫婦。蓋雌雄牝牡禽獸盡然。而況於人乎。天不能合男女以同為一形。人即不能廢夫婦而自由戀愛。懲夫婦之苦而去之。則其苦將更甚於有夫婦者。且以色事他人。能得幾時好。男無固定之婦。尚足以自樂。彼女無固定之夫。將安所歸哉。君子誦衛風之氓。而歎華落色衰。復相背棄者。之必不能免也。孔子論大同之制。曰女有歸。明女有二歸之道。即夫家與父母家也。公羊傳注。隱公二年春秋時。凡名歸者。每字子家。楚仲歸。鄭公子歸生。魯公孫歸父。齊析歸父。皆字子家者也。左傳文公十年。十二年宣公。十年襄公。十八年婦人外成。尤以夫家為重。故

謂嫁曰歸。鄭玄釋女有歸謂皆得良奧之家者是也。廢夫婦之倫而自由戀愛則士也罔極二三其德無夫家可歸矣。兄弟不知啞其笑矣。無父母家可歸矣。孔子不曰女有家而曰女有歸者。明女子以得所歸宿有安身立命之所者方為真正之獨立自由也。且大同之世明明有所謂其親其子若男女無別而女有歸之歸不是家則其親其子安從而別之哉。此又因大同之有父子而知其有夫婦也。既有夫婦則不得不有以和之矣。若夫仁義禮知信五常之德亦為大同世所不能廢。特大同世則由大道而行小康世則以禮義為紀有自然勉強廣大狹小之分耳。實則大同小康之別最重要者為公天下與家天下。有天下為公之政斯有貨力不為己之俗。而凡大同世一

切之成效可觀矣。有天下為家之政。斯有貨力為己之俗。而凡小康世所蘊蓄之權謀兵禍。皆在於此。雖因禮義為紀五常示民之故。畧著成效。然亦僅於小康而已矣。論者不探其本。或以為大同之世。不特無世及之禮。乃至並君臣父子兄弟夫婦四倫而無之。並義禮知信四常而無之。則未免推論太過。而屬於臆斷。此非孔子之本意也。吾昔著孔門理財學。亦嘗有此誤解。今謹改正之於此。

鄭玄禮運注云。大道謂五帝時也。迄今思之。殆近之矣。孔子明以三代之英為小康。且舉禹湯文武周公以實之。則小康之為三王無疑義矣。然先述大道之行。而後繼之以今大道既隱。曰今曰既。則大道之行。為在昔既往之事矣。五帝之世。雖本不足以言大同。然孔

子特以其天下為公而取之。因其既行大同世最要之事。故即託之五帝以寓其未逮之志也。

白虎通曰。王者受命必立天下之美號。以表功自見。明易姓為子孫制也。夏殷周者。有天下之大號也。百王同天下。無以相別。改制天下之大禮號。以自別于前。所以表著己之功業也。必改號者。所以明天命已著。欲顯揚己于天下也。己復襲先王之號。與繼體守文之君無以異也。五帝無有天下之號。何。五帝德大能禪。以民為子。成于天下。無為立號也。此孔門以五帝為公。天下異於夏殷周之說也。夏殷周立天下之美號。以表著己之功業。所謂以功為己也。又以明易姓為子孫制。所謂各親其親。各子其子。世及以為禮也。初有天下。即示天

下以私此其所以僅得小康也

春秋之義譏世卿言卿大夫之不得世也又譏父老子代從政亦言父老子不得世執政也然譏父老子代從政之義一見之於桓公五年天王使仍叔之子來聘再見之於桓公九年曹伯使其世子射姑來朝三四五見之於襄公十年十一月年齊世子光處乎諸侯之上而伐鄭譏仍叔之子者譏其以大夫之子代父也譏曹世子射姑齊世子光者譏其以諸侯世子代父也夫譏卿大夫之不得世則知諸侯及天子之不得世矣今更有譏諸侯世子父老子代從政之明文則天子之不得世益可知矣是何也父老子不得代從政其義通之於天子也吾讀春秋至昭公二十二年王室亂竊謂此乃譏世天子也

公羊傳何言乎王室亂言不及外也蓋室者家也家天下者必有亂故既不稱京師亦不舉其地如王城成周之類直稱之曰王室而已此鄙賤而狹小之辭也公羊傳謂不及外者即譏其如一家之亂與大局無關不及於一家以外也王者自私其家而家天下天下亦即視其家為私而置其亂於不問蓋深譏之也下文昭公二十六年春秋曰天王入于成周何注曰不言京師者起王室居在成周實外之夫春秋既正天王之名又正成周之為王居矣然猶不言京師以外天子者非外天子也以其為繼世之天子而外之耳蓋昭定哀之世文致太平故譏王室外天子以著天子不得世之義也然天子雖不得世而大同太平之世固猶有天子也聞者疑吾言乎

則請舉春秋以明之。僖公元年春秋曰：齊師宋師曹師次于聶北，救邢。公羊傳曰：救不言次，此其言次何？不及事也。不及事者何？邢已亡矣。孰亡之？蓋狄滅之。曷為不言狄滅之？為桓公諱也。曷為為桓公諱？上無天子，下無方伯，天下諸侯有相滅亡者，桓公不能救，則桓公恥之。曷為先言次而後言救？君也。君則其稱師何？不與諸侯專封也。曷為不與實與而文不與？文曷為不與？諸侯之義不得專封也。諸侯之義不得專封，則其曰實與之何？上無天子，下無方伯，天下諸侯有相滅亡者，力能救之，則救之可也。何邵公於諸侯之義不得專封也之下，注曰：此道大平制。夫諸侯不得專封為太平制，則諸侯得專封為據亂制矣。據亂制何以諸侯得專封？以上無天子，下無方伯也。此春

秋所以實與齊桓也。太平制何以諸侯不得專封。以上有天子。下有方伯也。此春秋所以文不與齊桓也。是故得何邵公之注。而太平制之有天子。信而有徵矣。宣公十一年。春秋不與楚莊王之專討陳夏徵舒。何注曰。辟天子故貶見之。亦謂辟太平世之天子也。故實與而文不與也。

雖然。所謂天子者。非尋常帝王之謂也。若尋常帝王足以當之。則春秋傳何以於上無天子之文。屢見不一見哉。豈春秋之時。周天子固不在位乎。莊公四年。公羊傳注曰。有而無益於治。曰無。然則無益於治之天子。雖有其名。不得謂之有也。有益於治之天子。雖無其名。不得謂之無也。所謂天子與非天子。端視其有益於治否耳。若東天子

之德居天子之位行天子之事成天子之治則無論其用何種名稱均可以天子視之矣

說苑至公篇曰書曰不偏不黨王道蕩蕩言至公也古有行大公者帝堯是也貴為天子富有天下得舜而傳之不私於其子孫也去天下若遺躍於天子下猶然况其細於天下乎非帝堯孰能行之孔子曰巍巍乎惟天為大惟堯則之易曰無首吉此蓋人君之公也夫以公與天下其德大矣推之於此刑之於彼萬姓之所載後世之所則也

卷十四吾昔嘗疑易經見羣龍无首吉之義或與吾所持太平世有天子之說不相容及觀劉向此言而知所謂无首吉者即傳賢不傳子之謂耳帝堯既足以當之然則所謂无首並非無君之謂矣

十一 三統

三統者二王之後與己為三統也。春秋所以通三統者其義甚廣。謹畧舉之。

其一則所以明天命也。天命所授者博。非獨一姓。漢書第三十六。故殷繼夏。周繼殷。春秋繼周。凡屬帝王皆不能以天下為私產。而革命之事業。乃順天應人。隨時而生焉。此所以杜帝王藉託天命。以為家天下之根據也。故春秋上黜杞。貶其公爵為子。新周故宋。王魯。以為三統。莊公二十七年。僖公二十三年。詩錄三頌。亦列周頌。魯頌。商頌。以備三恪。皆所以見天命無常。善則得之。不善則失之。天子無可自恃。而庶人有可自勉也。此天下為公之大義也。

其一則所以尊民權也。帝王易姓受代，名曰天命。實則民意，故曰天視自民視，天聽自民聽。民心所歸者，天予之；民心所去者，天奪之。凡以民為主而已矣。天生蒸民，不能相治，為立王者以統理之。方制海內，非為天子列土封疆，非為諸侯，皆以為民也。垂三統，列三正，去無道，開有德，不私一姓。明天下乃天下之天下，非一人之天下也。漢書第八十五。既非一人之天下，而天下之天下，則民為主矣。民既為主，則民欲何人為君，即何人為君。其君不得據天下為己有，而私之於其子孫矣。且民欲君位之繼世，即繼世。民欲君位之傳賢，即傳賢。唐虞之禪，既可變為殷周之繼，則殷周之繼，曷不可復為唐虞之禪矣。天與賢則與賢，天與子則與子，而天又不言，則亦惟民與賢則與賢。

民與子則與子而已矣。此所以謂天下乃天下之天下也。故三統之義明，則民權彰著，而天下為公矣。

其一則所以裁君權也。王者宰制天下，無所不臣，而獨於二王之後，特尊禮之，稱為上公，客而不臣，使之自治其國，用其先代之禮樂，隱然與新王有對抗之勢，而立鼎足三分之象，所以示先聖之當常焉。尊師法之當常存，天子之不獨貴，天下之不獨有也。此裁抑君權以明恭讓之義也。

其一則所以通治法也。三王之道，所祖不同，將以救前代之衰，而其流亦各自有失。孔子曰：夏道尊命，事鬼敬神而遠之；近人而忠焉，先祿而後威，先賞而後罰，親而不尊，其民之敝，蠢而愚，喬而野，朴而不

文殷人尊神率民以事神先鬼而後禮先罰而後賞尊而不親其民之敝蕩而不靜勝而無恥周人尊禮尚施事鬼敬神而遠之近人而忠焉其賞罰用爵列親而不尊其民之敝利而巧文而不慙賊而蔽禮記表記劉向曰夏后氏教以忠而君子忠矣小人之失野救野之失莫如敬故殷人之教以敬而君子敬矣小人之失鬼救鬼莫如文故周人教以文而君子文矣小人之失薄故救薄莫如忠故聖人之與聖也如矩之三雜規之三雜周則又始窮則反本也說苑卷十九何休曰王者起所以必改質文者為承衰亂救人之失也天道本下親親而質省地道敬上尊尊而文煩故王者始起先本天道以治天下質而親親及其衰敝其失也親親而不尊故后王起法地道以治天下文而

尊尊及其衰敝其失也尊尊而不親故復反之於質也公羊傳注桓公十一年夫正朔三而改故春秋損文以用忠文質再而復故春秋變文而從質河陽冬言狩而獲麟春言狩者蓋據魯變周之春以為冬去周之正而行夏之時也合伯子男為一者蓋改周之文從殷之質也三教所以先忠者行之本也三教一體而分不可單行不過王者行之有先後耳以忠敬文無時可去者也白虎通凡此皆通三統之義也而治道乃無偏而不舉之處矣

其一則所以廣異制也當王者貴固已獨定一尊而二王之後猶必各存舊法使古今之異制並行於同時中庸曰萬物並育而不相害道並行而不相悖小德川流大德敦化此天地之所以為大也即通

三統之義也。此與大一統之義似相反而實相成。蓋正惟寬博有容。然後足以大一統也。此孔教之在中國。所以能容諸教之自由。而其將來之在全球。亦必能大一統者也。

十二 仁恕

孔子之教千條萬緒。其宗旨果安在乎。曰孔教之唯一宗旨亦仁而已矣。呂氏春秋不二篇曰孔子貴仁。卷十七是其證也。孔子曰道二。仁與不仁而已矣。孟子曰夫道一而已矣。孟子第七第五一者何也。曰仁也。仁者何也。博愛之謂也。夫者仁天心也。亦即人心也。人之所以能與天相合。與人相處者。惟賴有仁心耳。擴而克之。足以保四海。足以澤萬世。本盡人皆有之仁心。行物我一體之仁道。其斯為孔教之

宗旨也乎。

夫天地之大德曰生。而孔子之德與天地合。故亦以好生為主。好生則不獨愛人。而且愛物。故春秋繁露曰。至於鳥獸昆蟲。莫不愛。不愛何足謂仁。第二十九。蓋孔教之仁。兼包民物而愛之也。然吾人既為人類。則用愛之道。宜有先後緩急之分。故孟子曰。親親而仁。仁民而愛物。第十三。此言愛人之尤急於愛物也。孔教以仁為宗旨。故一切義理制度。悉以愛人為歸。春秋繁露曰。愛人之大功者。莫大於思患而豫防之。第十七。患莫大於戰爭。故孔子所最惡者。莫如戰。禮運記孔子之言曰。講信脩睦。謂之人利。爭奪相殺。謂之人患。然則興和平之利。以豫防戰爭之患者。豈非孔教愛人之宗旨所最注重者耶。

孔教之宗旨在仁。而其行之則以恕。恕也者愛人之方法也。仁恕之別亦不過生熟難易之間耳。孔子曰夫仁者己欲立而立人己欲達而達人能近取譬可謂仁之方也已。論語第六孟子曰強恕而行求仁莫近焉第十三故恕也者即所以為仁也。子貢問曰有一言而可以終身行之者乎子曰其恕乎己所不欲勿施於人。論語第十五中庸記孔子之言曰忠恕違道不遠。施諸己而不願亦勿施於人。曾子曰夫子之道忠恕而已矣。論語第四蓋忠為體而恕為用。非忠則不能恕。舉恕可以包忠。故孔_子歸重於恕。此所謂一貫之道也。恕者推己以及人人己兼盡實合為我與兼愛而一之。非舍己而芸人也。大學曰有諸己而後求諸人無諸己而後非諸人所藏乎身不恕而能喻

諸人者未之有也。此先治己而後治人之恕也。孟子曰：老吾老以及人之老，幼吾幼以及人之幼，此先愛己而後愛人之恕也。孔教之所以異於他教者，即在恕字。蓋孔教與他^教皆言仁，惟他教言仁皆籠統說去，愛無差等，而孔教言仁則以恕行之，有倫有要。此孔教之所以最合於人情也。

耶教有所謂金律者，即孔教之恕字也。其言曰：己之所欲，當施於人，與孔教若合符節。此耶教最精之處也。顧或者謂耶教言施而孔教言勿施，似乎有異。不知人心之中，本有欲與不欲兩面。既言不欲勿施，則所欲施之必矣。此舉偏以見全之文法也。若謂孔教遺漏所欲施之一面，則耶教亦遺漏不欲勿施一面。此種咬文嚼字之小辯，豈

通論哉。中國之言語文字。每好從對面着筆。以求顯露而有力。故孔教之言恕。多發揮不欲勿施一面。然亦何嘗不言所欲當施哉。中庸於忠恕違道不遠之下。即言所求乎子臣弟友之道。當以之事父君兄及先施之於朋友。此非施諸己而願亦施於人何。尤有更顯者。欲立立人。欲達達人。此則明言所欲當施矣。且孔教僅一恕字。已是包括耶教之金律而有餘。蓋如心為恕。心之中有欲有不欲。如己心之所欲者而施於人。如己心之所不欲者而勿施於人。皆恕之事也。孔教但拈一恕字。已圓滿具足。無所遺漏。豈必問其從何方面以解釋之哉。

中庸曰。天命之謂性。率性之謂道。脩道之謂教。此三言者。孔教之總

綱也。性也者，即喜怒哀樂未發之中也。左傳成公十九年，劉子曰：民受天地之中以生，所謂命也。即此之謂也。中也者，天下之大本也。唯天下至誠，為能立天下之大本，即立此天命之性也。所謂盡其性也。所謂盡己之忠也。即所謂致中也。率性之謂道，道也者，不可須臾離也。君子之道，造端乎夫婦，又君子之道四，所求乎子，則以之事父；所求乎臣，則以之事君；所求乎弟，則以之事兄；所求乎朋友，則先施之。故曰：君臣也，父子也，夫婦也，昆弟也，朋友之交也。五者，天下之達道也。道不遠人，皆源於性。故君子以人治人，率性則謂之道。率性者，何也？本乎喜怒哀樂未發之中，而發之皆中節也。若是者，可謂之率性矣。亦可謂之和矣。和也者，天下之達道也。故謂之道也。是故性者，情

之未發者也。道者情之既發而中節者也。人之最難治者為情。故人與人最難相處。以情之不皆中節也。故情不能和。而五倫因之不能盡。而天下之達道。遂竟有離畔不行者。蓋惟恕然後能和。苟施諸己而不願。亦勿施於人。則夫婦子臣弟友之間。莫非和氣所彌綸矣。故曰唯天下至誠。為能經綸天下之大經也。大經者即五倫之謂也。是即率性之道也。率性者致和也。即盡人之性也。蓋推己及人之效也。脩道之謂教。則所謂致中和而天地位萬物育者也。所謂唯天下至誠。為能知天地之化育也。所謂唯天下至誠。能盡物之性。以贊天地之可化育。以與天地參也。此所謂一貫之道也。故曰夫子之道。忠恕而已矣。蓋忠者所以致中也。盡其性而立天下之大本也。恕者所以

致和也。盡人之性而行天下之達道也。苟能忠恕。則其極至於位
天地而育萬物。而成為脩道之教矣。此乃聖人之極致。教主之全功。
而其道實自忠恕始。故性道教三者皆一以貫之者也。然中權握要。
則恕為最重。蓋性之命本於天。而性之率視乎人。喜怒哀樂未發之
中。雖人皆有之。而中節之和。則所以驗其離道否也。不願勿施。則違
道不遠矣。此盡人可勉者也。庸德之行。庸言之謹。有所不足。不敢不
勉。有餘不敢盡。言顧行。行顧言。其斯為行恕之道也乎。
古之造文者。心止於一中者。謂之忠。持二中者。謂之患。故忠者一也。
一者誠也。誠者自成也。即盡己之謂忠也。而道自道也。即推己之謂
恕也。誠者物之終始。不誠無物。故忠也者。天下之大本也。自天子以

至於庶人壹是皆以脩身為本此之謂也然誠者非自成己而已也所以成物也故忠於己矣尤必恕而行之成己仁也即忠也成物知也即恕也此皆性之德也合外內之道也故時措之宜也此之謂一以貫之也蓋以忠行恕之謂也大學中庸皆言慎獨獨者一也慎獨者誠意之功即致其喜怒哀樂未發之中也誠於中形於外乃至為人君止於仁為人臣止於敬為人子止於孝為人父止於慈與國人交止於信是則恕之事也刑誠則形形則著著則明亦恕以盡倫之事也人之其所親愛而辟焉之其所賤惡而辟焉之其所畏敬而辟焉之其所敬而辟焉之其所教憤而辟焉故好而知其惡惡而知其美者天下鮮矣此則不恕之為患也蓋情發而不中節者也身不脩不可以齊其家蓋

不忠則不能恕矣。故君子不出家而成就於國。孝者所以事君也。弟者所以事長也。慈者所以使眾也。故治國在齊其家。此恕之效也。平天下在治其國。上老老而民興孝。上上長長而民興弟。上恤孤而民不倍。此亦恕之效也。至於絜矩之道。尤為恕之別名。故大學於平天下一章特發明之曰。所惡於上。毋以使下。所惡於下。毋以事上。所惡於前。毋以先後。所惡於後。毋以從前。所惡於右。毋以交於左。所惡於左。毋以交於右。此之謂絜矩之道。蓋絜矩之道。即平天下之道也。苟人人能以恕為心。則愛其國以及人之國。己國之所不欲者。亦勿施於人國。上下四旁各得其所。而天下平矣。尚何戰爭之故有哉。孔教之「金律」不徒以治人己之相與。乃以治國際之交涉。故大學於平天

下一章特首題提絜矩之道以為總綱此國際之道德也即愛人之仁也故恕也者合聖功王道而一之者也

卷第三 脩身

一 脩身通義

孔教平天下之道在於脩身。故大學八條脩身為本。中庸九經脩身最先。明脩身之重要也。大學曰。自天子以至於庶人。壹是皆以脩身為本。其本亂而未治者。否矣。其所厚者薄。而其所薄者厚。未之有也。是故脩身之道。盡人當行。蓋人孰無身。有身而不能脩。即不足以為人。尚何平天下之足望乎。

若夫為政者之脩身。則尤為重要矣。孔子曰。其身正。不令而行。其身不正。雖令不從。又曰。苟正其身矣。於從政乎何有。不能正其身。如正人何。此言為政當以正身為本也。故曰。政者正也。論語第十三十二

子路問君子。子曰脩己以敬。曰如斯而已乎。曰修己以安人。曰如斯而已乎。曰修己以安百姓。修己以安百姓。堯舜其猶病諸。安人者。凡與己有關係之人皆安也。至安百姓。則國治而天下平矣。孔子又曰。無為而治者。其舜也與。夫何為哉。恭己正南面而已矣。論語第十四。十五。恭己者。修己以敬之謂也。無為而治。則百姓安矣。中庸曰。詩云。不顯惟德。百辟其刑之。是故君子篤恭而天下平。此亦脩己以安百姓之義也。

孔子曰。故君子不可以不脩身。思脩身不可以不事親。思事親不可以不知人。思知人不可以不知天。此天人合一之道。而脩身為之本也。孔子曰。知仁勇三者。天下之達德也。所以行之者一也。一者誠也。

誠即敬也。此脩己以敬之義也。孔子曰：好學近乎知，力行近乎仁，知恥近乎勇。知斯三者，則知所以脩身。知所以脩身，則知所以治人。知所以治人，則知所以治天下國家矣。此言脩身為治天下國家之根本。而知仁勇三者又脩身之條目也。孔子又曰：齊明盛服，非禮不動。所以脩身也。亦脩己以敬之謂也。中庸

孟子曰：天下之本在國，國之本在家，家之本在身。第七又曰：言近而指遠者，善言也；守約而施博者，善道也。君子之言也，不下帶而道存焉。君子之守，脩其身而天下平；人病舍其田而芸人之田，所求於人者重，而所以自任者輕。第十四觀此則知孔子之道所守者約，而所施者博。自任者重，而求人者輕。惟有自脩其身而已矣。至於脩其身

而天下平。則不求人而人應之。所謂施博者也。

孟子曰：君子有三樂，而王天下不與存焉。父母俱存，兄弟無故，一樂也。仰不愧於天，俯不忤於人，二樂也。得天下英才而教育之，三樂也。君子有三樂，而王天下不與存焉。按第一樂固有待於天，第三樂亦有待於人，均非盡人可得者。謹置勿論。若第二樂，則能脩其身者之樂，盡人可勉而得者也。以不愧不忤為樂，而王天下猶不足比數。此誠足見脩身之重大矣。孟子又曰：廣土眾民，君子欲之，所樂不存焉。中天下而立，定四海之內，民君子樂之，所性不存焉。君子所性，雖大行不加焉，雖窮_居不損焉，分定故也。君子所性，仁義禮智根於心，其生色也，睟然見於面，盎於背，施於四體，四體不言而喻。第十三夫君子

所性在於身心其大無外其小無內是故孟子曰萬物皆備於我矣
反身而誠樂莫大焉第十三是故雖中天下而立定四海之民猶非
性分所存然則此身之重為何如哉世之賢知者或侈為高遠之論
粗淺者更迷於功利之談每謬謂脩身寡過無與大道豈知身也者
天下國家之本也身之不脩尚何高遠之足驚身之不脩更何功利
之可言不能正身而徒欲正人不能^成己而空言成物其勢必兩失之
者也嗟乎此世之所以多亂也

中庸曰誠者自成也而道自道也誠者物之終始不誠無物是故君
子誠之為貴誠者^者非自成己而已也所以成物也成己仁也成物知
也性之德也合外內之道也故時措之宜也吾今謹為之言曰孔子

之教始終於誠。惟誠故必先以成己為工夫。然後能以成物為效驗。此一貫之道。仁智雙脩。故曰合外內之道也。若鄙薄成己。侈語成物。則遺己而逐物。既為不仁。先物而後己。亦為不知。重外而輕內。更非合外內之道。其弊端在不誠。不誠故無物。而已與物皆不能成矣。故必知脩身為本。然後其意乃誠。意誠而後身可脩也。身脩而後天下可平也。其不知脩身為本者。皆自欺者也。雖日日從事於治國平天下。亦自欺而欺人者也。此非反於自成之誠。自道之道不可也。吾故曰孔教以個人為單位也。

二 儒行

孔教脩身之道。最為繁博。條舉每多挂漏。禮記儒行一篇。作於孔子

自衛而反魯之時是年孔子六十八歲也。儒行者儒教之規條也。合此則謂之儒。反此則不得謂之儒。若人能遵守孔教實行儒行之所言則天下必和平而無戰爭矣。謹錄儒行全文於左。以為世人宗仰孔教者之模範而促進世界之和平矣。和其文曰。

魯哀公問於孔子曰。夫子之服。其儒服與。孔子對曰。丘上居魯。衣逢掖之衣。長居宋。冠章甫之冠。丘聞之也。君子之學也博。其服也鄉。丘不知儒服。

哀公曰。敢問儒行。孔子對曰。遽數之不能終其物。悉數之乃留。更僕未可終也。

哀公命席。孔子侍。

曰。儒有席上之珍。以待聘。夙夜強學。以待問。懷忠信。以待舉。力行。以待取。其自立有如此者。

儒有衣冠中。動作慎。其大讓如慢。小讓如偽。大則如威。小則如愧。其難進而易退也。粥粥若無能也。其容貌有如此者。

儒有居處齊難。其坐起恭敬。言必先信。行必中正。道塗不爭險易之利。冬夏不爭陰陽之和。愛其死。以有待也。養其身。以有為也。其備豫有如此者。

儒有不寶金玉。而忠信以為寶。不祈土地。立義以為土地。不祈多積。多文以為富。難得而易祿也。易祿而難畜也。非時不見。不亦難得乎。非義不合。不亦難畜乎。先勞而後祿。不亦易祿乎。其近人有如此者。

儒有委之以貨財、淹之以樂好、見利不虧其義、刼之以眾沮之以兵、見死不更其守、鷙蟲攫搏不程勇者、引重鼎不程其力、往者不悔、來者不豫、過言不再、流言不極、不斷其威、不習其謀、其特立有如此者、儒有可親而不可刼也、可近而不可迫也、可殺而不可辱也、其居處不淫、其飲食不溇、其過失可微辨而不可面數也、其剛毅有如此者、儒有忠信以為甲冑、禮義以為干櫓、戴仁而行、抱義而處、雖有暴政、不更其所、其自立有如此者、

儒有一畝之宮、環堵之室、簞門圭窬、蓬戶甕牖、易衣而出、并日而食、上答之不敢以疑、上不答不敢以詔、其仕有如此者、

儒有今人與居、古人與稽、今世行之、後世以為楷、適弗逢世、上弗援、

下弗推、讒諂之民有比黨而危之者、身可危也、而志不可奪也、雖危起居竟信其志、猶將不忘百姓之病也、其憂思有如此者、

儒有博學而不窮、篤實而不倦、幽居而不淫、上通而不困、禮之以和為貴、忠信之美、優游之法、慕賢而容衆、毀方而瓦合、其寬裕有如此者、

儒有內稱不辟稱、親外舉不辟怨、程功積事、推賢而進達之、不望其報、君得其志、苟利國家、不求富貴、其舉賢有如此者、

儒有聞善以相告也、見善以相示也、爵位相先也、患難相死也、久相待也、遠相致也、其任舉有如此者、

儒有澡身而浴德、陳言而伏靜而正之、上弗知也、廢而翹之、又不急

為也。不臨深而為高，不加少而為多。世治不輕，世亂不沮。同弗與，異弗非也。其特立獨行有如此者。

儒有上不臣天子，下不事諸侯，慎靜而尚寬，強毅以與人，博學以知服近文章，砥厲廉雖分國如錙銖，不臣不仕，其規為有如此者。

儒有合志同方，營道同術，並立則樂，相下不厭，久不相見，聞流言不信，其行本方立義，同而進，不同而退，其交友有如此者。

溫良者，仁之本也；敬慎者，仁之地也；寬裕者，仁之作也；孫接者，仁之能也；禮節者，仁之貌也；言談者，仁之文也；歌樂者，仁之和也；分散者，仁之施也。儒皆兼此而有之，猶且不敢言仁也。其尊讓有如此者。儒有不隕穫於貧賤，不充詘於富貴，不恩君王，不累長上，不閔有司。

故曰儒

今眾人之命儒也妄常以儒相詬病
孔子至舍哀公館之聞此言也言加信行加義終沒吾世不敢以儒
為戲

卷第四 教化

一 教育

教育之道為改良人性製造平和之根本而中國之教育尤以和平為主故中國人之愛平和一由於民族之特性一由於教育之宗旨世界各國苟欲促進平和則孔子之教育不可不取法也

學記曰古之教者家有塾黨有庠術有序國有學此學校之等級也教育普及之義於此可見矣

孔子曰弟子入則孝出則弟謹而信汎愛眾而親仁行有餘力則以學文論語第二此小學之課程也文者古之遺文如弟子職之類及禮樂射御書數之六藝也

論語曰子之武城聞弦歌之聲夫子莞爾而笑曰割雞焉用牛刀子游對曰昔者偃也聞諸夫子曰君子學道則愛人小人學道則易使也子曰二三子偃之言是也前言戲耳第十七道者禮樂也愛人易使則禮樂之效也夫子游為武城宰而教民以絃歌此所謂小學之教也君子小人同是學道則教育平等無分貴賤也其後之分為君子小人者地位之別耳然而各就其本分以著為愛人易使之事實焉若是則君子小人各盡其道而平和可保矣

王制曰樂正崇四術立四教順先王詩書禮樂以造士春秋教以禮樂冬夏教以詩書王太子王子羣后之太子卿大夫元士之適子國之俊選皆造焉凡入學以齒此大學之課程也孔子教育之制有一

大特色。則以樂正主國學是也。尚書堯典。罔以典樂之夔。膺教育國
育國子之任。其教育之道。則使之直而溫。寬而栗。剛而無虐。簡而無
傲。此所謂變化氣質也。即周官亦以大司樂掌成均之瀆。以樂德樂
語樂舞教國子。而所謂樂德。則中和祇庸孝友是也。蓋樂主於和。而
孔子之教育主於樂。此其所以為和平之教育乎。

學記曰。比年入學。中年考校。一年視離經辨志。三年視敬業樂羣。五
年視博習親師。七年視論學取友。謂之小成。九年知類通達。強立而
不反。謂之大成。夫然後足以化民成俗。近者說而遠者懷之。此大學
之道也。學校考試之法。具於此矣。總而觀之。則德育與智育並重而
已。離經敬業。博習論學。知類通達。所謂智育也。辨志樂羣。親師取友。

強立不反。所謂德育也。其效至於化民成俗。近說遠懷。然則教育之功。真足以長養平和哉。

六經之教。皆足以致治。然物之所偏。未能無蔽。雖云大道其砥。則同。孔子曰。入其國。其教可知矣也。其為人也。溫柔敦厚。詩教也。疏通知遠。書教也。廣博易良。樂教也。絜靜精微。易教也。恭儉莊敬。禮教也。屬辭比事。春秋教也。故詩之失。愚。書之失。誣。樂之失。奢。易之失。賊。禮之失。煩。春秋之失。亂。其為人也。溫柔敦厚。而不愚。則深於詩者也。疏通知遠。而不誣。則深於書者也。廣博易良。而不奢。則深於樂者也。絜靜精微。而不賊。則深於易者也。恭儉莊敬。而不煩。則深於禮者也。屬辭比事。而不亂。則深於春秋者也。禮記經解是故六經之道。本無失。然

而尚有流失者則未深於經者也誠能深於經學而以之教民則移風易俗無偏無蔽而一國皆治矣推而廣之則天下皆平矣

孔子之教育莫重於教世子然所以教國民者即同之王制所謂國之後選與王太子同學者是也文王世子亦曰故世子齒於學國人觀之曰將君我而與我齒讓何也曰有父在則禮然然而眾知父子之道矣其二曰將君我而與我齒讓何也曰有君在則禮然然而眾著於君臣之義也其三曰將君我而與我齒讓何也曰長長也然而眾知長幼之節矣故父在斯為子君在斯謂之臣居子與臣之節所以尊君親親也故學之為父子焉學之為君臣焉學之為長幼焉父子君臣長幼之道得而國治父子君臣長幼之道得而國治此孔子

之教育。所以為長養平和也。以王世子之尊。而在學受業時。猶與國人齒。此固所以明父子君臣長幼之道。亦所以使國人與王世子受同等之教育也。此平等之精神也。

孔子教育之制。王太子與國民同等。但王太子為國本所寄。故教習之法。論之最詳。亦以其可通於下也。論教太子者。以賈誼新書為最備。大戴禮記採之為傳篇。誠所謂吐辭為經者也。茲謹全錄之。以立普通教育之標準。而為天下後世法。其文曰。

殷為天子三十餘世而周受之。周為天子三十餘世而秦受之。秦為天子二世而亡。人性非甚相遠也。何殷周有道之長。而秦無道之暴。其故可知也。古之王者。太子乃生。固舉以禮。使士負之。有司齋肅端

冕見之南郊見之天也過闕則下過廟則趨孝子之道也故自為赤
子時教固已行矣昔者周成王幼在襁褓之中召公為太保周公為
太傅太公為太師保保其身體傅傳其德義師導之教訓此三公之
職也於是為置三少皆上大夫也曰少保少傅少師是與太子宴者
也故孩提三公三少固明孝仁禮義以導習之也逐去邪人不使見
惡行於是比選天下端士孝悌閑博有道術者以輔翼之使之與太
子居處出入故太子乃日見正事聞正言行正道左視右視前後皆
正人夫習與正人居不能毋不正也猶生長於齊不能不齊言也習
與不正人居不能毋不正也猶生長於楚不能不楚言也故擇其所
嗜必先受業乃得嘗之擇其所樂必先有習乃得為之孔子曰少成

若天性、習貫之為常。此殷周之所長有道也。及太子少長、知色、妃則入于小學。小者所學之宮也。學禮曰：帝入東學，上親而貴仁，則親疏有序，如恩相及矣。帝入南學，上齒而貴信，則長幼有差，如民不誣矣。帝入西學，上賢而貴德，則聖智在位，而功不匱矣。帝入北學，上貴而尊爵，則貴賤有等，而下不踰。矣。帝入太學，承師問道，退習而端於太傳罰。其不則，而達其不及，則德智長而理道得矣。此五義者，既成於上，則百姓黎民化緝於下矣。學成治就，此殷周之所以長有道也。及太子既冠成人，免於保傅之嚴，則有司過之史，有虧膳之宰。太子有過，史必書之，史之義不得不書過，不書過則死。過書而宰徹去膳，夫膳宰之義不得不徹膳，不徹膳則死。於是有進善之旌，有誹謗之木，有敢諫

之鼓。瞽夜誦詩。工誦正諫。士傳民語。習與智長。故切而不攘。化與心成。故中道若性。是殷周所以長有道也。三代之禮。天子春朝朝日。秋暮夕月。所以明有別也。春秋入學。坐國老。執醬而親饋之。所以明有孝也。行中鸞和步中采茨。趨中肆夏。所以明有虔也。虔於禽獸見其生。不食其死。聞其聲。不嘗其肉。故遠庖廚。所以長恩。且明有仁也。食以禮。徹以樂。失度。則史書之。工誦之。三公進而讀之。宰夫減其膳。是天子不得為非也。明堂之位。曰篤聞仁而好學。多聞而道慎。天子疑則問。應而不窮者。謂之道。道者導天子以道者也。常立於前。是周公也。誠立而敢斷。輔善而相義者。謂之克。克者克天子之志也。常立於左。是太公也。絜廉而切直。匡過而諫邪者。謂之弼。弼者拂天子之過者。

也。常立於右，是召公也。博聞強記，接給而善對者，謂之承。承者，承天子之遺忘者也。常立於後，是史佚也。故成王中立而聽朝，則四聖維之。是以慮無失計，而舉無過事。殷周之所以長久者，其輔翼天子有此具也。及秦不然，其俗固非貴辭讓也。所尚者，告得也。固非貴禮義也。所尚者，刑罰也。故趙高傳胡亥而教之獄，所習者，非斬劓人則夷人三族也。故今日即位，明日射人。忠諫者謂之誹謗，深為計者謂之誣誣。其視殺人若艾草菅然，豈胡亥之性惡哉？彼其所以習導非其治故也。鄙語曰：不習為吏，如視已事。又曰：前車覆，後車誡。夫殷周所以長久者，其已事可知也。然如不能從，是不法聖知也。秦世所以亟絕者，其轍迹可見也。然而不辭者，是前車覆而後車必覆也。夫存亡

之變治亂之機其要在是矣天下之命懸於天子天子之善在於早
諭教與選左右心未疑而先教諭則化易成也夫開於道術知義理
之指則教之功也若夫服習積貫則左右已胡越之人生而同聲嗜
慾不異及其長而成俗也象數譯而不能相通行雖有死不能相為
者教習然也故曰選左右早諭教最急夫教得而左右正左右正則
天子正矣天子正而天下定矣書曰一人有庶民兆民賴之此時務也
天子不諭先聖王之德不知君國畜民之道不見禮義之正不察應
事之理不博古之典傳不閑於威儀之數詩書禮樂無經學業不法
凡是其屬太師之任也天子無恩於父母不惠於庶民無禮於大臣
不中於制獄無經於百官不哀於喪不敬於祭不信於諸侯不誠於

戎事不誠於賞罰。不厚於德。不强於行。賜與侈於近臣。鄰愛於疏遠。卑賤不能懲忿窒慾。不從太師之言。凡是其屬太傅之任也。天子處位不端。受業不敬。言語不序。聲音不中律。進退節度無禮。升降揖讓無容。周旋俯仰視瞻無儀。妄顧咳唾趨行不得色。不比順。隱琴瑟。凡此其屬太保之任也。天子宴辟廢其學。左右之習反其師。答遠方諸侯。不知文雅之辭。應羣臣左右。不知已諾之正。簡聞小誦。不傳不習。凡此其屬少師之任也。天子居處出入不以禮。冠帶衣服不以制。御器在側不以度。上下雜采不以章。忿怒說喜不以義。賦與譙讓不以節。凡此其屬少傅之任也。天子宴私安如易。樂而湛。飲酒而醉。食肉而餒。飽而強。飢而慄。暑而暍。寒而嗽。寢而莫宥。坐而莫侍。行而莫先。

莫後。天子自為開門戶，自取玩好，自執器皿，亟顧環面，御器之不舉，不藏。凡此其屬，少保之任也。號呼歌謠，聲音不中律，宴樂雅誦逆樂序，不知日月之時節，不知先王之諱與大國之忌，不知風雨雷電之眚。凡此其屬，太史之任也。

易曰：正其本，萬物理失之毫釐，差之千里。故君子慎始也。春秋之元，詩關雎，禮之冠婚，易之乾乾，皆慎始敬終云耳。爾素成，謹為子孫娶妻嫁女，必擇孝悌世世有家行義者。如是則其子孫慈孝，不敢媼暴，黨無不善，三族輔之。故曰：鳳凰生而有仁義之意，虎狼生而有貪戾之心，兩者不等，各以其母。嗚呼！戒之哉！無養乳虎，將傷天下。故曰：素成胎教之道，書之玉板，藏之石室，置之宗廟，以為後世界戒。青史氏

之記曰古者胎教王后腹之七月而就宴室太師持銅而御戶左太
宰持升而御戶右比及三月者王后所求聲音非禮樂則太子緼瑟
而稱不習所求滋味者非正味則太宰倚升而言曰不敢以待王太
子太子生而泣太師吹銅曰聲中某律太宰曰滋味上某然後卜名
上無取於天下無取於隆中無取於名山通谷無拂於御鄉俗是故
君子名難知而易諱也此所以養恩之道古者年八歲而出就外傳
舍學小藝焉履小節焉束髮而就大學學大藝焉履大節焉居則習
禮文行則鳴珮玉升車則聞和鸞之聲是以非僻之心無自入也在
衡為鸞在軾為和馬動而鸞鳴鸞鳴而和應聲曰和和則敬此御之
節也上車以和鸞為節下車以珮玉為度上有葱衡下有雙璜衝牙

玳珠以納其間。琺瑯以雜之行。以采芡。趨以肆夏。步環中規。折還中矩。進則揖之。退則揚之。然後玉鏘鳴也。古之為路車也。蓋圓以象天。二十八橑以象列星。軫方以象地。三十輻以象月。故仰則觀天文。俯則察地理。前視則睹鸞和之聲。側聽則觀四時之運。此巾車教之道也。周后妃任成王於身。立而不跂。坐而不差。獨處而不倨。雖怒而不詈。胎教之謂也。成王生。仁者養之。孝者經之。四賢傍之。成王有知而選太公為師。周公為傅。此前有與計。而後有與慮也。是以封泰山而禪梁甫。朝諸侯而一天下。猶此觀之。王左右不可不練也。

昔者禹以夏王。桀以夏亡。湯以殷王。紂以殷亡。闔廬以吳戰勝無敵。夫差以見禽於越。文公以晉國霸。而厲公以見殺於匠黎之宮。威王

以齊強於天下。而簡公以弑於檀。穆公以秦顯名尊號。二世以刺於望夷之宮。其所以君王同而功績不等者。所任異也。故成王處繯抱之中。朝諸侯。周公用事也。武靈王五十而弑沙邱。任李兌也。齊桓公得管仲。九合諸侯。一匡天下。再為義王。失管仲。任豎刁狄牙。身死不葬。為天下笑。一人之身。榮辱具施焉者。在所任也。故魏有公子無忌。而削地復得。趙得藺相如。而秦不敢出。安陵任周贍。而國人獨立。楚有申包胥。而昭王反復。齊有田單。襄王得其國。由是觀之。無賢佐俊士。而能成立。^功立名。安危繼絕者。未之有也。是以國大不務大。而務得民心。佐不務多。而務得賢臣。得民心者。民從之。有賢佐者。士歸之。文王請除炮烙之刑。而殷民從。湯去張網者之三面。而二垂至。越王不

顏舊冢而吳人服以其所為順於人也。故同聲則異處而相應。意合則未見而相親。賢者立於本朝。而天下之豪相率而趨之也。何以知其然也。管仲者桓公之讎也。鮑叔以為賢於已而進之桓公。七十年言說乃聽。遂使桓公除仇讎之心。而委之國政焉。桓公垂拱無事而朝諸侯。鮑叔之力也。管仲之所以北走桓公而無自危之心者。同聲於鮑也。衛靈公之時。蘧伯玉賢而不用。迷子瑕不肖而任事。史鰌患之。數言蘧伯玉賢而不聽。病且死。謂其子曰。我即死。治喪於北堂。於吾生不能進蘧伯玉而退迷子瑕。是不能正君者。死不當成禮。而置屍於北堂。於我足矣。靈公往弔。問其故。其子以父言聞。靈公造然失容。曰。吾失矣。立召蘧伯玉而貴之。召迷子瑕而退之。徙喪於堂。成禮。

而後去。衛國以治。史鰌之力也。夫生進賢而退不肖。死且未止。又以
屍諫。可謂忠不衰矣。紂殺王子比干。而箕子被髮陽狂。靈公殺泄冶。
而鄧元去陳以族從。自是之後。殷并於周。陳亡於楚。以其殺比干與
泄冶而失箕子與鄧元也。燕昭王得郭隗。而鄒衍樂毅自齊魏至於
是。舉兵而攻齊。棲閔王於莒。燕支地計不與齊均也。然如所以能申
意至於此者。由得士也。故無常安之國。無宜治之民。得賢者安存。失
賢者危亡。自古及今。未有不然者也。明鏡者所以察形也。往古者所
以知今也。夫知惡古之危亡。不務襲迹於其所以安存。則未有異於
却走而求及於前人也。太公知之。故興微子之後。而封比干之墓。夫
聖人之於當世存者乎。其不失可知也。

此篇首言宗社之本在於太子貴甄簡左右以導習雖為貳君猶有所尊雖為天子猶有拂士是殷周所由久安乂也後言教太子者必慎之於妃匹之始端之於衽席之上重之以震夙之禮而又臨以師保佐以聖賢乃能底^終太平故上陳三代下究六國推夫古今興廢之迹未有不得賢而昌失賢而亡者蓋為君者當無日不在保傅之中故賢^得為最重也傳子之世君不必賢若能依此篇之法有胎教以端其本復有賢臣以任其政君而賢歟固君臣相得其不賢歟亦國以安存此長治久安之道也

若夫吾之所以特取此篇之意則不專注於教君而在使天下人人皆享與君同等之教育於擇婚之法胎教之道皆精講而實行之至

於求師取友求勸善規過尤孳孳焉以終其身則習慣成自然摩厲而益進久而久之日進不已則社會道德之程度日高人種改良之成效日著靈性之傳受既遞衍而逾明美習之薰陶亦推移而愈淑乃至人性皆善習俗皆善且性善而習益善習善而性益善相引而進相推而上而太平大同之道乃真可實現矣豈尚有戰爭之患哉嗚呼此孔教之所謂教育也孟子以得天下之英才而教育之為三樂之一而王天下不與存焉第十三誠哉其足樂也

二 禮樂

樂記曰。樂由中出。禮自外作。樂由中出。故靜。禮自外作。故文。大樂必易。大禮必簡。樂至則無怨。禮至則不爭。揖讓而治天下者。禮樂之謂也。暴民不作。諸侯賓服。兵革不試。五刑不用。百姓無患。天子不怒。如此則樂達矣。合父子之親。明長幼之序。以敬四海之內。天子如此。則禮行矣。

子張問政。子曰。師乎前。吾語女乎。君子明於禮樂。舉而措之而已。子張復問。子曰。師。爾以為必鋪几筵。升降酌獻酬酢。然後之禮乎。爾以為必行綴兆。興羽籥。作鐘鼓。然後謂之樂乎。言而履之。禮也。行而樂之。樂也。君子力此二者。以南面而立。夫是以天下太平也。禮記仲尼

燕居

凡此皆言以禮樂治天下則可以致太平也。

中國之禮字無所不包。舉凡一切有形無形之文明皆包括在內。是故孔子曰。以之居處有禮。故長幼辨也。以之閨門之內有禮。故三族和也。以之朝廷有禮。故官爵序也。以之田獵有禮。故戎事閑也。以之軍旅有禮。故武功成也。是故宮室得其度。量鼎得其象。味得其時。樂得其節。車得其式。鬼神得其饗。喪紀得其哀。辨說得其黨。官得其體。政事得其施。加於身而錯於前。凡眾之動得其宜。孔子又曰。禮之所興。眾之所治也。禮之所廢。眾之所亂也。目巧之室。則有奧阼。席則有上下。車則有左右。行則有隨。立則有序。古之義也。室而無奧阼。則亂。

於堂室也。席而無上下，則亂於席上也。車而無左右，則亂於車也。行而無隨，則亂於塗也。立而無序，則亂於位也。昔聖帝明王諸辨貴賤侯長幼遠近男女外內，莫敢相踰越。由此塗出也。皆禮記仲尼燕居蓋禮者萬事之規律也。

禮為萬事之規律，故無一可以遺禮而為國為尤甚。故孔子曰：為國以禮。又曰：能以禮讓為國乎？何有？不能以禮讓為國，如禮何？論語第十一及第四。孔子又曰：故聖人耐以天下為一家，以中國為一人者，非意之也。必知其情，辟於其義，明於其利，達於其患，然後能為之。何謂人情？喜怒哀懼愛惡欲七者，弗學而能。何謂人義？父慈子孝，兄良弟弟，夫義婦聽，長惠幼順，君仁臣忠，十者謂之人義。講信修睦，謂之

人利爭奪相殺謂之人患故聖人之所以治人七情修十義講信修睦尚辭讓去爭奪舍禮何以治之禮記禮運要而言之禮者治國平天下之大法也聖人之所以能一家天下一人中國者皆用禮之故也興人利除人患使天下皆有講信修睦之美而無爭奪相殺之禍非孔教之禮其孰能致此哉

孔子曰夫禮者所以章疑別微以為民坊者也故貴賤有等衣服有別朝廷有位則民有所讓禮記坊記故禮也者防亂而教讓者也至於樂以和為本亦以和為效樂也者以和平感人使人莫不和平者也樂記曰是故樂在宗廟之中君臣上下同聽之則莫不和敬在族長鄉里之中長幼同聽之則莫不和順在閭門之內父子兄弟同

聽之則莫不和親。故樂者審一以定和。比物以飾節。節奏合以成文。所以合和父子君臣。附親萬民也。是先王立樂之方也。是故樂也者。養人之和。息人之爭者也。孔子曰。移風易俗。莫善於樂。孝經其斯為和平之鼓吹也乎。

夫樂本起於和順。和順積於中。然後榮華發於外。是故八音者德之華也。歌者德之言也。舞者德之容也。故聽其音可以知其德。察其詩可以達其意。論其數可以正其容。薦之宗廟。足可以享鬼神。用之朝廷。足以序羣臣。立之學宮。足以序萬民。協凡人之從上教也。皆始於音。音正則行正。故聞宮聲則使人溫雅而廣大。聞商聲則使人方正而好義。聞角聲則使人惻隱而好仁。聞徵聲則使人整齊而好禮。聞羽聲

則使人樂養而好施。所以感蕩血脈，流通精神，存寧正性，故樂從中
出，禮從外作也。禮樂接於身，望其容而民不敢慢，觀其色而民不敢
爭，故禮樂者君子之深教也。不可須臾離也。君子須臾離禮，則暴慢
襲之；須臾離樂，則姦邪入之。是以古者天子諸侯雅樂鐘磬，未嘗離
於庭；卿大夫御琴瑟，未嘗離於前，所以養仁義而除淫辟也。魯詩傳
曰：天子食日舉樂，諸侯不釋縣，大夫士日琴瑟。王者治定制禮，功成
作樂，未制作之時，取先王之禮樂宜於今者用之。堯曰：大章，舜曰：蕭
韶。夏曰：大夏，殷曰：大護，周曰：大武。各取其時，民所樂者名之。堯時民
樂其道，章明也；舜時民樂其道，脩紹堯道也；夏時民樂大，其三聖相
承也；殷時民樂大，其護己也；周時民樂太，其伐紂也。蓋異號而同意。

異歌而同歸。公羊傳注隱公五年

是故樂也者。發生於和平。而又以發生和平者也。涵養德成性變化氣質。使人油然有相親相愛之心。而無爭競鬪陵之氣。非樂其孰能致此哉。樂記曰。故樂行而倫清。耳目聰明。血氣和平。移風俗。天下皆寧。吾故曰。樂者製造平和之具也。

凡樂有舞。舞有文舞。有武舞。文舞左手執籥。右手秉翟。其為誕敷文德之意。可不待言。若武舞則朱干玉戚。比於武事。何所用之。不知春秋稱武舞為萬。公羊傳曰。萬者何。干舞也。何注曰。干謂楯也。能為人捍難而不使人害。故聖王貴之。以為武樂。萬者其篇名。蓋三代皆有萬舞。篇內各紀開國功業。夏時或詠禹之治水。殷周則各詠其服天

下之功也。然則孔教之所謂武者可知也矣。能為人捍難而不使害人。此吾中國之所貴乎武者也。雖用武器。亦有防禦而無侵畧。其斯為平和之義也哉。

三名教

凡帝王御世之大權。寓於賞罰。教主御世之大權。寓於褒貶。孔子教主也。非帝王也。善善而不能賞。惡惡而不能罰。將何以使斯民有所勸懲也哉。以別教主言之。則福善禍淫。惟俟諸上帝而已。然上帝之賞善罰惡。其徵驗或未盡符合於生人之耳目。則人猶或未能盡信也。故孔子於此。除神道設教之外。尤有以名為教之義焉。

孔子曰。君子疾沒世而名不稱。論語第十五又曰。立身行道。揚名於

後世以顯父母孝之終也。孝經故名也。者孔子特立之大義。所以賞善罰惡者也。春秋之義善善惡惡。賢賢賤不肖。一字之褒榮於華衮。一字之貶嚴於斧鉞。蓋以名為教者也。故謂之名教也。孔子不得位作春秋以行天子之事。貶天子退諸侯。討大夫以達王事。其所持之柄不過空名。然而春秋之義行。則天下亂世臣賊子懼焉。此亦孔子御世之大權也。故曰春秋者聖人之刑書也。

夫以匹夫操筆尚足以使天下後世之王公大人知所畏懼相率而改行焉。則有國家者果能主持公道發為清議。安見強橫無理之國不心生畏懼而保守和平也哉。故國際裁判雖難於執行法律。然苟以名為法則褒貶之間榮辱生焉。此亦國際裁判之利器也。特患裁判

者不能自正無從正人耳。而不然者。公道自在人心。清議等於賞罰。何遽無勸懲之法也哉。此則不用征伐而自然能令列國生畏之道也。

孔子之褒貶。即孔子之賞罰。其精意實為道德與法律之公例。茲謹條舉之以見孔子之律意焉。

一 凡治世之道。當探其本。大者正則小者治。近者說則遠者來。故春秋之譏二名。一見之於魯。仲孫何忌。再見之於晉。魏曼多。魯內國也。春秋王魯。當先自正而後正人也。晉同姓之最大國也。正人者當先正大以帥小。故先正晉也。是故行法者由近者始。由大者始。則無不行矣。公羊傳注隱公元年。定公六年。哀公十三年。若強大之國。以

侵犯弱為當然之事。是先不能自正也。世界之和平。何由得鞏固也哉。

二 凡行法者。當隨意善惡而原之。欲之者善。重惡深。不得已者善。輕惡淺。所以原心定罪。春秋之義。誅意不誅事也。公羊傳注。隱公元年定公十三年。是故春秋之治獄。志善而違於法者免。志惡而合於法者誅。鹽鐵論第五十五

三 凡有志為善。雖力不足而事未成。春秋貴之。不以成敗論人。所以勸善也。僖公九年。宋公禦說卒。春秋不書葬。為襄公諱也。何注曰。襄公背殯出會。宰周公有不子之惡。後有征齊憂中國尊周室之心。功足以除惡。故諱不書葬。使若非背殯。又二十一年。楚人使宜申來。

獻捷春秋不言捷乎宋為襄公諱也何注曰襄公本會楚欲行霸憂中國也見詐執伐宋幾亡其國故諱為沒國文所以申善志孔子曰苟志於仁矣無惡也論語第四言行人果志在於仁則其餘行終無惡也宋襄霸業不成而春秋予之此其貴志之義也乎世之以有心無力自餒或以成敗論人者其亦當孔子之教矣

四 凡計功除罪之法有罪者得以功除之僖公十七年春秋曰夏滅項公羊傳曰孰滅之齊滅之曷為不言齊滅之為桓公諱也春秋為賢者諱此滅人之國何賢爾君子之惡惡也疾始善善也樂終桓公嘗有繼絕存亡之功故君子為之諱也時桓公德衰功廢而滅人嫌當坐故述所賞盛美而為之諱所以尊其德彰其功不月者桓公

不坐滅也。蓋桓公立魯僖公以繼絕，足除殺子糾之惡，封邢封衛，封杞以存三亡國，足除滅譚滅遂滅項之惡。其服楚之功尤大，足以覆篡國之大惡而有餘。故孔子於春秋最美桓公之功也。

五 凡有大功者，不獨可除本身之惡，且可掩前人之惡。晉文公有尊王攘夷之功，然其去父出奔則當絕。返國又為篡本惡甚大，春秋諱之。且並惠公之入，懷公之出，皆不書，明其並足以除惠懷之惡也。

《公羊傳僖公十年》

六 凡有大功者，當加尊榮於其君父。緣臣子尊榮，莫不欲與君父共之，故加榮於其君父，所以養忠臣孝子之志也。如曹喜時有讓國之功，則春秋於宣公十四年書曹伯壽之卒，以榮其父。吳季札有讓

國之功則春秋於襄公十二年書吳子乘之卒以榮其父又於二十九年使吳有君所謂許人臣者必使臣許人子者必使子也

七 凡王者受命不追治前事惟有功者則追封之孔子曰不教而殺謂之虐不戒視成謂之暴慢令致期謂之賊論語第二十故春秋於在春秋前犯罪者不治魯大夫叔隱而立之春秋不貶是也然而邾叔術讓國亦在春秋前而春秋追而賢之也公羊傳隱公元年昭

公三十一年

八 凡父子兄弟罪不相及而功則及子孫蓋孔子之教善善也長惡惡也短惡惡止其身善善及子孫也昭公十一年春秋曰冬十有一月丁酉楚師滅蔡執蔡世子有以歸用之公羊傳曰此未踰年之

君也。其稱世子何？不君靈公，不成其子也。不君靈公，則曷為不成其子？誅君之子不立，非怒也，無繼也。蓋蔡靈公為弑父之賊，法當誅絕。是謂誅君本無繼嗣之理，不成其子，得以繼父，仍不過罰靈公耳。非遷怒於其子也。此之謂惡惡止其身也。昭公二十年，春秋曰：夏，曹公孫會自鄆出奔宋。公孫會者，公子喜時之後也。喜時有讓國之功，有明王興，當還國於其後，乃不幸有會，身為畔臣，理應誅絕。故孔子諱之，不言以鄆出奔宋，而變以言自，蓋以喜時之讓，除會之叛也。此之謂善善及子孫也。孔子不使行善者有後患，故特寬待賢者子孫，所以勸賢也。

九 凡有過而能變悔者，春秋賢之。昔秦繆公不用百里奚，蹇叔之

言以敗于殽後感而變悔自作秦誓以記過遂霸西戎孔子以其有悔過之心載秦誓於尚書又於春秋文公十二年書曰秦伯使遂來聘使秦有大夫所以賢繆公也何賢乎繆公以其能變也孔子不念舊惡而與人為善誠足令有過者鼓舞而自新哉有過者當勿自棄矣十 凡犯大惡者苟無功以抵消之雖悔過其惡仍在然既能悔過則春秋善之哀公七年秋魯獲邾婁子益魯獲人益被獲皆大惡當絕也明年春秋曰歸邾婁子益于邾婁何注曰獲歸不書此書者善魯能悔過歸之嫌解邾婁子益無罪書故復名之蓋此書獲歸雖善魯之悔過而邾婁子不能除不死位之罪魯亦不能以解釋邾婁子除其獲人之罪故書名以兩罪之所謂善惡不相掩也

十一 凡始犯者春秋嚴誅之。所以省刑絕惡也。隱公二年無駭帥師入極。為始滅人國。春秋終其身不氏。以貶之。重作俑之罰也。

卷第五 理財

一 理財總義

大學一書於修身齊家治國皆不言理財直至平天下一章始大言理財蓋財也者流通於天下非合天下以言之則財不可得而理也且天下之不平端在財之不理故欲平天下尤不可不注重理財也然理財雖為平天下之大本而其義亦通於修身齊家治國非僅用之以平天下而已今且畧引大學以明之

大學曰所惡於上毋以使下所惡於下無以事上所惡於前毋以先後所惡於後毋以從前所惡於右毋以交於左所惡於左毋以交於右此之謂絜矩之道絜矩之道者即所謂恕也此平天下之要道也

財之理不理及天下之平不平胥視此矣

大學曰是故君子先慎乎德有德此有人有人此有土有土此有財有財此有用德者本也財者末也外本內末爭民施奪是故財聚則民散財散則民聚貨悖而入者亦悖而出此言德為本而財為末有德則必有財若棄德而重財則民有爭心施其劫奪之事財雖聚而民反散且悖入者終必悖出雖財亦不能久聚矣故必慎德於己均財於民而後民聚民聚則有財矣此本末之所以不可倒置也

大學曰生財有大道生之者眾食之者寡為之者疾用之者舒則財恒足矣此理財之正義也能由此大道以生財則財不可勝用而國可治天下可平矣

大學又曰。孟獻子曰。畜馬乘。不察於雞豚。伐冰之家。不畜牛羊。百乘之家。不畜聚斂之臣。與其有聚斂之臣。寧有盜臣。此謂國不以利為利。以義為利也。長國家而務財用者。必自小人矣。彼為善之。小人之使為國家。菑害並至。雖有善者。亦無如之何也。矣。此謂國不以利為利。以義為利也。此言義則為國家之利。而利本非國家之利。若但務財用。則必有菑害並至之禍。此所以有盜臣。猶愈於有聚斂之臣也。要而論之。內末者。爭民施奪。務財者。菑害並至。戰爭之禍。未有能免者也。誠欲國家之治。天下之平。則必^以道德仁義為主。而不以財用為利。大學曰。未有上好仁而下不好義者也。未有好義其事不終者也。未有府庫財非其財者也。此不言利而利自在其中者也。况又有生

財之大道。豈長國家而尚以財不足為患乎。以義為利。此孔子之所
以平天下也。即絜矩之道也。

二 不言利

凡利為禍亂之原。欲弭兵爭。必禁言利。故論語_曰。子罕言利。第九。又云。
子曰。放於利而行。多怨。第四。

易曰。利者義之和也。和猶言調適也。義以方外。若但言義不言利。則
方外而或不能和。故利為義之和。國語曰。言義必及利。韋昭注曰。能
利人物。然後為義。卷三。此即易經利物足以和誼。義之誼。亦即利字
最初之誼也。君子明於義利。當趨而趨。當避而避。其趨者利也。即義
也。其避者不利也。即不義也。然而急君父之難。赴湯蹈火而不顧其

身雖有似於不利而亦趨之則以合乎義即為利也視不義之富貴如浮雲祿之以天下弗顧也繫馬千駟弗視也雖有似於利而亦避之則以不合乎義即為不利也若小人則反是矣利其所利或君子不以為利不以為義者而亦利之不利其所不利或君子所視為利視為義者而亦不利之君子知利不外義故喻於義而利在其中小人知利不知義故喻於利而義非所顧論語第四時至春秋君子道微故孔子罕言利以其理精微恐人或誤習其說將惟知有利不復知有義則爭利之禍烈也此孔子保持章平和消弭戰爭之深意也至戰國之世爭利日甚秦用商君富國強兵楚魏用吳起戰勝弱敵齊威王宣王用孫子田忌之徒而諸侯東面朝齊天下方務於合從連

衡以攻伐為賢。故孟子述孔子之意以作孟子七篇。不特罕言利。且辭而闢之。其開宗明義第一章。即首以禁言利為事。蓋世變愈亟。則慮患愈深也。以錄蓋謹錄其全文於左。

孟子見梁惠王。王曰。叟不遠千里而來。亦將有以利吾國乎。孟子對曰。王何必曰利。亦有仁義而已矣。王曰。何以利吾國。大夫曰。何以利吾家。士庶人曰。吾^何以利吾身。上下交征利。而國危矣。萬乘之國。弑其君者必千乘之家。千乘之國。弑其君者必百乘之家。萬取千焉。千取百焉。不為不多矣。苟為後義而先利。不奪不餒。未有仁而遺其親者也。未有義而後其君者也。王亦曰。仁義而已矣。何必曰利。

此孟子禁言利以絕內亂之旨也。蓋孔子二百十六年之事也。上下

交征利而國危。不奪不餒。爭利者必有不利之結果。世之為功利之學者。其亦當知所懼乎。仁不遺親。義不後君。不言利而利在其中矣。此所謂兩得之也。司馬遷曰。余讀孟子書。至梁惠王問何以利吾國。未嘗不廢書而歎也。曰。嗟乎。利誠亂之始也。夫子罕言利者。常防其原也。故曰。放於利而行。多怨。自天子至於庶人。好利之弊。何以異哉。史記第七十四遷可謂得孔孟之心矣。夫使自天子至於庶人。皆以好利為戒。天下豈尚有戰禍哉。

欲弭國內之爭亂。固不可言利。欲弭國際之爭亂。亦不可言利。此其義。孟子於孔子二百四十一年發之最明。告子篇曰。宋牼將之楚。孟子遇於石上。曰。先生將何之。曰。吾聞秦楚構兵。我將

見楚王說而罷之。楚王不悅。我將見秦王說而罷之。二王所將有所
遇焉。曰軻也。請無問其詳。願聞其指。說之將何如。曰。我將言其不利
也。曰。先生之志則大矣。先生之說則不可。先生以利說秦楚之王。秦
王楚之王悅於利。以罷三軍之師。是三軍之士樂罷而悅於利也。為
人臣者懷利以事其君。為人子者懷利以事其父。為人弟者懷利以
事其兄。是君臣父子兄弟終去仁義。懷利以相接。然而不亡者。未之
有也。先生以仁義說秦楚之王。秦楚之王悅於仁義。而罷三軍之師。
是三軍之士樂罷而悅於仁義也。為人臣者懷仁義以事其君。為人
子者懷仁義以事其父。為人弟者懷仁義以事其兄。是君臣父子兄
弟去利懷仁義以相接。然而不王者。未之有也。何必曰利。

此孟子禁言利以絕戰禍之旨也。夫秦楚構兵而以利害說罷之。此豈非仁人君子之用心者耶。然以利害為前提。則縱能收目前之功。必反釀異日之禍。懷利相接。未有不亡。此縱橫家所以為傾危之士也。若不言利而以仁義為號召。則風聲所樹。俗美化行。不言利而大利即至。此則王天下之道矣。焉用戰。

凡言利尚不可。則求利更不可矣。春秋於桓公十五年書曰。春二月。天王使冢父來求車。公羊傳曰。何以書。譏何譏爾。王者無求。求車非禮也。文公九年書曰。春。毛伯來求金。公羊傳曰。毛伯者何。天子之大夫也。何以書。譏何譏爾。王者無求。求金非禮也。是子也。繼文王之體。守文王之法度。文王之法。無求而求。故譏之也。桓公十五年。穀梁傳。

曰古者諸侯時獻于天子以其國之所有故有辭讓而無徵求求車非禮也求金甚矣何休曰王者千里畿內租稅足以共費四方各以其職來貢足以尊榮當以至廉無為率天下不當求求則諸侯貪大夫鄙士庶盜竊

韓詩外傳曰天子不言多少諸侯不言利害大夫不言得喪士不言通財貨不為賈道故駟馬之家不時雞豚之息伐冰之家不圖牛羊之入千乘之君不通貨財家鄉不修幣施大夫不為場圃妾積之臣不貪市井之利是以貧窮有所歡而孤窮有所措其手足也此孔教不言利之義故孔教之禁言利其對於理財為社會政策其對於道德為重義輕利其對於平和為消滅爭端此其效也

凡不言利之訓。所以抑制在位。保護平民。而非謂聚人可以無財也。
董仲舒曰。皇皇求財利者。常恐乏匱者。庶人之意也。皇皇求仁義。常
恐不能化民者。大夫之意也。漢書第五十六故平民非特可以言利。
且可以求利也。然利亦自有公私之辨。在位者不得言利。亦謂其對
於私利耳。若夫民生國計之大經大法。亦安得不言乎。此不可誤會
者也。但好利之性。與生俱來。無論為公為私。皆宜以罕言為上。蓋口
公利而心私利。世間既不乏其人。而爭權奪利之心。風勢且橫行。而
無忌。中國近日。沈醉歐化。權利競爭。重於身命。廉恥掃地。舉國騷然。
而歐洲大戰。亦數年不息。此皆爭利之禍也。欲有以救治之。非返之
不言利之義。不可。

三井田

凡國以民為本，民以食為天。衣食足而知榮辱，廉讓生而爭訟息。故足民為太平之本也。孔教之足民，以井田之法為主。民三年耕則餘一年之畜，故三載考績，至三考黜陟，則九載而餘三年食。進業曰登矣。再登曰平，則十有八載。餘六年食矣。三登曰泰平，則二十七歲。遺九年食，而德化流洽，禮樂成矣。孔子曰：如有王者，必世而後仁。言井田之法，行之三十年，則致太平而頌聲作也。夫進上農功，工諸事業而名之曰登，登者成也。再登曰平，三登曰泰平。然則太平之本固在農工商諸實業之成績也。實業有進化，斯平和有進化矣。漢書第二十四井田之法，為孔教致太平之要道，而言之最詳者莫如公羊傳注。

宣公十五年謹錄之如下

夫飢寒並至雖堯舜躬化不能使野無寇盜貧富兼并雖臯陶制法不能使疆不陵弱是故聖人制井田之法而口分之一夫一婦受田百畝以養父母妻子五口為一家公田十畝即所謂十一而稅也廬舍二畝半凡為田一頃十二畝半八家而九頃共為一井故曰井田廬舍在內貴人也公田次之重公也私田在外賤私也井田之義一曰無泄地氣二曰無費一家三曰同風俗四曰合巧拙五曰通財貨因井田以為市故俗語曰市井種穀不得種一穀以備災害田中不得有樹以妨五穀還廬舍種桑荻雜菜畜五母雞兩母豕瓜果種疆畔女上蠶織老者得衣帛焉得食肉焉死者得葬焉多於五口名曰

餘夫餘夫以率受田二十五畝十井共出兵車一乘司空謹別田之高下善惡分為三品上田一歲一墾中田二歲一墾下田三歲一墾肥饒不得獨樂境埆不得獨苦故三年一換土易居財均力平兵車素定是謂均民力彊國家在田曰廬在邑曰里一里八十戶八家共一巷中里為校室選其耆老有高德者名曰父老其有辯護伉健者為里正皆受倍田得乘馬父老比三老孝弟官屬里正比庶人在官吏民春夏出田秋冬入保城郭田作之時春父老及正旦開門坐塾上晏出後時者不得出莫不持樵者不得入五穀畢入民皆居宅里正趨緝績男女同巷相從夜績至於夜中故女功一月得四十五日作從十月盡正月止男女有所怨恨相從而歌飢者歌其食勞者歌

其事男年六十女年五十無子者官衣食之使之民間求詩鄉移於
邑邑移於國國以聞於天子故王者不出牖戶盡知天下所苦不下
堂而知四方十月事訖父老教於校室八歲者學小學十五者學大
學其有秀者移於鄉學鄉學之秀者移於庠庠之秀者移於國學學
於小學諸侯歲貢小學之秀者於天子學於大學其有秀者命曰造
士行同而能偶別之以射然後爵之士以才能進取君以考功授官
三年耕餘一年之畜九年耕餘三年之積三十年耕有十年之儲雖
遇唐堯之水殷湯之旱民無近憂四海之內莫不樂其業

井田之法今日為工業世界非復農業世界固不能行然其義則萬
古常新也今使在於全國而此民與彼民之財均在於全球而此國

民與彼國民之財均如是而仍有戰爭者殆必無之事也。

孔子曰小人貧斯約富斯驕約斯盜驕斯亂禮者因人之情而為之節文以為民坊者也故聖人之制富貴也使民富不足以驕貧不至於約貴不慊於上故亂益亡禮記坊記此節文者謂農有田里之差士有爵命之級也井田之制即因人之情而為之節文使貧富得以調均而不至於盜與亂者也

四 通財

凡財者天地所生非一家之有有無當相通故春秋於隱公元年書曰天王使宰咺來歸惠公仲子之賵春秋之例先是己物乃言歸定公十年書齊人來歸運謹龜陰田是也今此賵之車馬先非魯物竟

言歸者許魯使有之之辭也。此可謂之國際社會主義也。然則私產之制固非孔子之所主張。而禮運所謂貨惡棄地不必藏己者。允為孔子之志矣。夫天下之兵禍大率起自爭財。若有財而猶不私。則亦何爭之有。此有無相通之義。所以為平和之本也。

五 尚儉

凡儉為美德。生財之本。廉讓之原。自衛之要。平和之道也。故春秋重之。莊公三年春秋曰。五月葬桓王。此未有崩者。何以書葬。以其榮奢改葬。故惡錄之也。此孔子惡奢之義也。宣公六年公羊傳紀晉靈公使勇士某往殺趙盾之事。曰勇士入其大門。則無人門焉者。入其閭。則無人閭焉者。上其堂。則無人焉。俯而闕其戶。方食魚飧。勇士曰嘻。

子誠仁人也。吾入子之大門，則無人焉。入子之閨，則無人焉。上子之堂，則無人焉。是子之易也。子為晉國重卿而食魚飧，是子之儉也。君將使我殺子，吾不忍殺子也。雖然，吾亦不可復見吾君矣。遂刎頸而死。何注曰：傳極道此者，明約儉之衛，甚於重門擊柝。孔子曰：禮與其奢也，寧儉。此之謂也。嗚呼！何邵公洵能得孔子之意。通春秋之義矣。夫人不儉，則不能廉；不廉，則不能讓；而爭奪起焉。己以不能廉讓而起爭奪，人亦不能廉讓而起爭奪。此殺人而自殺之道也。即專就理財言之，不儉之禍，腐損母財，雖以極厚之積聚，可立空之。其害不特至於困窮，其勢必終歸於爭奪。此孔子所以尚儉而惡奢也。近人忘本，非聖。妄習歐風，反謬謂儉非美德，欲以奢侈為理財之方。華飾為立

國之術。而其實則以縱欲敗度。自便私圖。嗚呼。禍中國者。必自非儉之言。榮奢之行始矣。

尚儉之義。非獨私人應爾也。即國家亦當行之。孔子曰。道千乘之國。敬事而信。節用而愛人。使民以時。班固明其效曰。故民皆勸功樂業。先公而後私。漢書第二十四。此言為國者之不可不節用也。國家不能節用。始則侵奪其民。繼則侵奪鄰國。其禍亦與私人無異也。若夫以不能節用之故。致令國家破產。失其獨立。此則不能侵奪他國。而召他^國之侵奪矣。此亦破壞平和之道也。

六譏^譏加賦

凡戰爭之事。必約與國。而征伐會盟。迄無寧歲。其勢必至於國用不

用而增加民之負擔足昔魯哀公於十年二月會吳伐齊十一年五月
會吳伐齊十二年夏又會吳于橐皋外慕彊吳空盡國儲故於十二
年之春始用田賦孔子六十九年蓋於田稅十而取一之外再按田
為率取其他財物十之一以充國用也春秋書曰用田賦以譏之則
凡因戰事而加賦者皆孔子之所譏矣此孔子惡戰之義也蓋不戰
則無須乎加賦而不加賦亦將不能戰譏其加賦而戰禍可以紓矣

卷第六 夫婦

一 齊家通義

凡齊家為治國平天下之本。易曰：家人有嚴君焉。父母之謂也。父子兄弟。夫婦。而家道正。正家而天下定矣。此言天下和平之本於家道正也。

大學曰：所謂治國必先齊其家者。其家不可教而能教人者無之故。君子不出家而成教於國。孝者所以事君也。弟者所以事長也。慈者所以使眾也。此言齊家治國皆同一理。其能治國與否。先於其家見之也。

又曰：一家仁。一國興仁。一家讓。一國興讓。一人貪戾。一國作亂。其機

如此此謂一言僨事一人定國此言家國相因一國之仁讓作亂其
機端繫於人君之一家其國之和平與不和平即於其家決之也
又曰宜其家人而后可以教國人宜兄宜弟而后可以教國人其為
父子兄弟足法而后民法之也此謂治國在齊其家凡此皆言齊家
為治國之本也

是故欲天下之和平者不可不先於正家加之意也孔子曰書云孝
于惟孝友于兄弟施於有政是亦為政言正家要其為為政論語第三即是為政也明乎此
而後人不至先舍其家而侈言救國救世矣此有本與無本之異也

二 總論夫婦之倫

孔教之倫理從夫婦始故中庸曰君子之道造端乎夫婦及其至也

察乎天地。周易序卦曰：有天地，然後有萬物；有萬物，然後有男女；有男女，然後有夫婦；有夫婦，然後有父子；有父子，然後有君臣；有君臣，然後有上下；有上下，然後禮義有所錯。故易之上經以乾、坤為始，天地也；其下經以咸、恒為始，夫婦也。夫婦者，人道之本，而天地之象也。故孔子重之，郊特牲曰：男女有別，然後父子親，父子親，然後義生，義生，然後禮作，禮作，然後萬物安，無別無義，禽獸之道也。此夫婦之別，所以為人道之始也。

孔子五百十有三年，匡衡言於漢元帝曰：室家之道修，則天下之理得。故詩始國風，禮本冠婚。始于國風，原情性而明人倫也。本乎冠婚。正基兆而防未然也。福之興，莫不本乎室家。道之衰，莫不始乎梱內。故聖王必慎妃后之際，別適長之位，禮之

於內也。卑不踰尊，新不先故，所以統人情而理陰氣也。孔子五百二十年，衡又言於漢成帝曰：妃匹之際，生民之始，萬福之原。婚姻之禮，正然後品物遂而天命全。孔子論詩，以關雎為始，言太上者民之父母，后夫人之行不侔乎天地，則無以奉神靈之統，而理萬物之宜。故詩曰：窈窕淑女，君子好仇。言能致其貞淑，不貳其操，情欲之感，無介乎容儀，宴私之意，不形乎動靜，夫然後可以配至尊而為宗廟主。此綱紀之首，王教之端也。自上世以來，三代興廢，未有不由此者也。漢書第八十一 匡衡之闡發經義，可謂最精切矣。

司馬遷曰：自古受命帝王，及繼體守文之君，非獨內德茂也，蓋亦有外戚之助焉。夏之興也，以塗山而桀之放也，以末喜。殷之興也，以有

娥紂之殺也。嬖妲己。周之興也。以姜原及太任。而幽王之禽也。淫於
褒姒。故易基乾坤。詩始關雎。書美釐降。春秋譏不親迎。夫婦之際。人
道之大倫也。禮之用。唯婚姻為兢兢。夫樂調而四時和。陰陽之變。萬
物之統也。可不慎焉。與史記第四十九據遷之言。則三代興廢。皆由
外戚。信而有徵矣。故孔子制作六經。皆以夫婦之倫為始。誠重之也。
若以中國今日最近之事言之。則滿清之亡。成於慈禧太后。而極於
隆裕太后。三百年之國祚。遂終於二女子之手。哀哉。聖人之言。洵可
畏也。

凡夫婦之倫。兼其他四倫之義。故春秋不以夫人要公為大惡。蓋妻
事夫有四義焉。雞鳴繼縱筭而朝。君臣之禮也。三年惻隱。父子之恩也。

圖安危可否兄弟之義也。樞機之內寢席之上朋友之道也不可純以君臣之義責之也。公羊傳注莊公二十四年

凡夫妻一體而辨牝合故婦人學事舅姑不學事夫。示婦與夫一體也。故春秋於內無貶公之道則貶夫人以明之。儀禮喪服傳白虎通公羊傳宣公元年

凡夫妻平等自天子至於庶人同名曰妻。妻者齊也。共牢而食合鬯而醕醕所以合體同尊卑以親之也。故婦人無爵從夫之爵坐以夫之齒。昏義郊特牲

三 嫁娶

一 凡嫁娶之期男三十而娶女二十而嫁此中制也男長女幼者

陽道舒陰道促也。百虎通嫁娶太早則未知為人父母之道而有子。是以教化不明而民多夭。漢書第七十二此早婚之失也。嫁娶太晚則非所以重繼嗣而國君為尤甚。故魯成公即位十有四年始娶元妃。非重繼嗣之義。春秋畧之於叔孫僑如如齊逆女不書其月。又古者七十而傳宗事與子。年雖幼未滿三十自得少娶。故曾子問曰宗子雖七十無無主婦。此言宗子已老傳宗事與子則宜有主婦。此皆早娶之義也。要而論之三十二十之年嫁娶之正禮也。若國君及士大夫因繼嗣之重特行早娶亦事勢之宜也。然庶人又豈不重繼嗣乎。何以三十而娶也。曰庶人之繼嗣比之國君及士大夫為輕。且此中有一天然制限則庶人之財力不及士大夫必三十然後生計之。

獨立可以鞏固方無家累之苦也

二 凡妻妾皆不娶同姓重人倫防淫泆恥與禽獸同也且男女同姓其生不繁左傳僖公二十三年故同姓不昏惡不殖也國語卷上魯昭公十年娶於同姓之吳謂之吳孟子春秋不書其事於是年去冬以貶之孟子卒於哀公十二年春秋書曰孟子卒不繫吳者禮人繫姓不繫國雖不諱猶不繫國也不稱夫人不言薨不書葬者深諱之也外屬小功已上亦不得娶故春秋之義於僖公二十五年宋蕩伯姬來逆婦三十一年杞伯姬來求婦皆譏娶母黨也也百虎通

三 凡王者之娶必先選於大國之女禮儀備所見多詩云大邦有子子覩天之妹文定厥祥親迎于渭明王者必娶大國也桓公二年春

秋曰秋七月紀侯來朝紀子以嫁女於天子故增爵稱侯知雖小國者必封以大國明其尊所_不臣也天子得娶庶人女以其得專封故不遺善也先封之而後與之交禮也后者所以奉宗廟傳無窮重莫大焉故封之百里也

四 凡天子娶后得使諸侯為媒公羊傳桓公八年

五 凡諸侯不得自娶國中以諸侯不得專封義不可臣其父母且內娶則為漁色也僖公二十五年春秋曰宋殺其大夫公羊傳曰何以不名宋三世無大夫三世內娶也何注曰禮不臣妻之父母國內皆臣無娶道故絕去大夫名正其義也何注曰外小惡正之者宋以內娶故公族以弱妃黨益彊威權下流政分三門卒生篡弑親親出

奔疾其末故正其本是故諸侯不內娶則國家無外戚之禍矣禮記坊記云諸侯不下漁色謂不內娶也內娶之象猶捕魚然中網取之無所采擇故立不內娶之義則國君有遠色之美國民無選妃之累矣

六 凡諸侯不娶乎大夫以其賤不可奉宗廟故春秋略之文公四年娶於齊大夫春秋曰夏逆婦姜于齊何注曰不書逆者主名卑不為錄使也不言如齊者大夫無國也不稱女者方以婦姜見與至共文重至也不稱夫人為致文者賤不可奉宗廟也不言氏者本當稱女女者父母辭君子不奪人之親故使從父母辭不言氏

七 凡天子之太子諸侯之世子皆以天子諸侯禮娶與君同示無

再娶之義也。百虎通

八 凡天子嫁女于諸侯。必使諸侯同姓者主之。諸侯嫁女于大夫。必使大夫同姓者主之。莊公元年。春秋曰。夏。單伯逆王姬。天子使魯主之也。何注曰。不自為主者。尊卑不敵。其行婚姻之禮。則傷君臣之義。行君臣之禮。則廢婚姻之好。故必使同姓有血脈之屬。宜為父道。與所適敵體者主之。禮尊者嫁女於卑者。必待風旨。為卑者不敢先求。亦不可斥與之者。申陽倡陰和之道。天子嫁女於諸侯。備姪娣如諸侯之禮。義不可以天子之尊。絕人繼嗣之路。春秋又曰。秋。築王姬之館于外。公羊傳曰。築之禮也。于外非禮也。主王姬者。必為之改築。於路寢則不可。小寢則嫌。羣公子之舍。則以卑矣。其道必為之改築。

者也。然于外何以非禮。為營衛不固。且疏王姬也。魯桓公於去年被殺于齊。魯以齊為讎國。王姬嫁齊。故魯築館于外。然仇讎之人。非所以接婚姻。衰麻非所以接弁冕。天子之使魯主婚者。非也。魯本自得以讎為解。其受命于京師者。亦非也。既受命矣。又築于外。進退失據。故春秋譏之也。

九 凡王后或王姬之過竟者。當有送迎之禮。故春秋於襄公十五年。書曰。劉夏逆王后于齊。莊公十一年。書曰。冬。王姬歸于齊。皆以其過魯書之也。

十 凡大夫位隆任重。不得私交外國。故無外娶之禮。尤不得越竟親迎。及偕妻越竟歸宗。致於政事有所損曠。公羊傳莊公二十七年。

宣公五年士卑不嫌容得外娶故士昏禮曰若異邦贈^則大夫送者以束錦然若為士時先聘異國女後為大夫而娶亦不得親迎或縱妻歸宗也

十一 凡嫁娶當慕賢者與夷狄交婚則春秋諱之僖公聘楚女為嫡故春秋於僖公元年進楚稱人使若中國以諱其交婚來^夷狄之失也大戴禮曰女有五不取逆家子不取亂家子不取世有刑人不取世有惡疾不取喪婦長子不取逆家子者為其逆德也亂家子者為其亂人倫也世有刑人者為其棄於人也世有惡疾者為其棄於天也喪婦長子者為其無所受命也^{第八}士

十二 凡男不自專娶故男不親求女不自專嫁故女不親許必由

父母須媒妁。所以養廉遠耻。防淫佚也。故婚禮不稱主人。有父則父命之。無父則尊母命以行。然母命不通。所以遠別。故以母命命諸父。凡師友以達。惟無母者則辭窮而稱主人。是變禮也。公羊傳隱公二年

年

十三。凡昏姻之禮廢。則夫婦之道苦。而淫辟之罪多。禮記經解魯季姬者。伯姬之媵也。伯姬許嫁邾婁。於僖公九年卒。禮嫡未嫁而死。媵猶當往。以國君不再娶也。故僖公十四年。魯致季姬于邾婁。行及防。遇鄫子而悅之。使來請已。僖公許焉。春秋譏之。書曰。夏六月。季姬及鄫子遇于防。使鄫子來朝。夫鄫子諸侯。季姬魯女。今乃以鄫子而受季姬所使。絕而賤之。不以為諸侯也。月者甚惡內也。明年九月。春

秋曰李姬歸于鄆蓋先淫于鄆子而今始嫁也其明年春秋又曰夏四月丙申鄆李姬卒棄正作淫神弗福也僖公十九年春秋曰夏六月宋人曹人邾婁人盟于曹南鄆子會盟于邾婁己酉邾婁人執鄆子用之蓋魯本許嫁李姬于邾婁為媵乃李姬淫佚使鄆子請己而許之邾鄆二國交忿宋襄公為此盟欲和解之既在會間反為邾婁所欺執用鄆子恥辱加於宋無異故沒襄公使若微者也盟之前會于曹南而盟實在邾婁乃上文不地以邾婁而曰曹南者深為襄公諱使若不為邾婁事盟而鄆子自就邾婁為所執也曹伯邾婁子而不言君者為襄公諱也上盟不日者深順諱文從微者例使若下執不以上盟為辨也會盟不日者言會盟則不信己明無取於日也書

用之者惡無道也。邾婁君而稱人者，貶其爵也。目者，魯不能防正其女，以至於此，明當痛其女禍而自責之也。然鄆子以一女子之故，喪身辱國，夫婦之道，莫苦於此矣。結婚而無禮，徒以自由為樂者，其鑒之哉。

十四 凡孔教之道，有經有權。嫁娶之由，父母者經也。其或由己者，權也。萬章問於孟子曰：詩云「娶妻如之何，必告父母」，舜之不告而娶，何也？孟子曰：告則不得娶，男女居室，人之大倫也。如告則廢人之大倫，以懟父母，是以不告也。此可見男子之娶，得自親也。孟子第九列女傳曰：許穆夫人者，衛懿公之女也。初許求之，齊亦求之，懿公將與許女。因傅母而言曰：諸侯之^有太女子，所以繫援於大國也。許小而遠，

齊大而近，使邊疆有寇戎之事，赴告大國，妾在不猶愈乎？衛侯不聽。其後狄入衛，而許不能救，衛侯奔走涉河，至楚丘，許夫人馳驅歸唁，而作載駟。君子嘉其慈惠而遠識也。韓詩外傳曰：高子問於孟子曰：夫嫁娶者，非己所自親也，衛女何以得編於詩也？孟子曰：有衛女之志，則可。無衛女之志，則急。大道二，常謂之經，變謂之權，懷其常道而挾其變權，乃得為賢。夫衛女行中孝，慮中聖權，此孟子嘉許穆夫人之言也。孔子編之於詩，亦嘉之也。以見女子之嫁得自親也。其詩曰：控于大邦，誰因誰極。意欲赴告于齊，而因齊子也。時齊桓新霸，齊子又衛女，故許穆夫人賦載驅而齊侯使公子無虧帥師戍曹，無虧即齊子所衛之甥也。殆夫人遣使謀於齊子之力，歟？婦人無外事，而許

穆夫人控于大邦。此又救母國之權義也。

十五 凡昏禮有六。先納采。問名。納吉。納徵。請期。然後親迎。前五禮皆命使為之。惟親迎則自天子至於庶人。皆親自行之。隱公二年。春秋月。曰。九月。紀履緌來逆女。譏紀子不親迎而使大夫也。桓公八年。春秋曰。祭公來。遂逆王后于紀。譏天子不親迎而使三公也。所以必親迎者。示男先於女也。男率女。女從男。剛柔之義也。天先乎地。君先乎臣。其義一也。又以陽下陰。以高下下。以男下女。柔上而剛下。敬而親親之義也。儀禮昏禮郊特牲。白虎通荀子第二十七。

親迎之禮。女立於東房中。南面而俟。壻姆在其右。女從者在其後。主人迎壻於廟門外。壻執雁入。揖讓升堂。父立阼階上。面。母立房外之

西南面。壻在房戶當木楣北面奠雁再拜稽首。所謂執摯以相見也。親迎時不僅奠雁。諸侯以屨二兩加琮。大夫庶人以屨二兩加束脩。二曰某國寡小君使寡人奉不珍之琮。不珍之屨。禮夫人貞女。於是母受琮。取一兩屨以履女。且命之女拜。母乃親引其手授壻於戶。婿引手出戶。出於母左。婿行女從。降自西階。女拜辭。父母於堂。父西面戒之。母行至西階上戒之。父母皆不降階。女拜諸母於大門。諸母申之以父母之命以戒之。婿先升婦車。執轡授婦。御輪三周。然後婿下車。曲顧其婦。道之以義也。壻先行。俟於門外。婦至。壻揖婦以入。儀禮昏禮說苑修文篇卷十九白虎通

十六 凡士庶當夕成昏。次日見舅姑。即成婦禮。大夫以上。則三月

而後廟見稱婦。擇日而祭于禰。父母使大夫操禮而致女。先成婦而後成昏。必三月者。取一時足以別貞信。貞信著然後成婦禮也。成公九年。春秋曰。二月伯姬歸于宋。夏季孫行父如宋致女。此三月然後成婦之証也。杜預曰。古者女出嫁。又使大夫隨加聘問。存謙敬序殷勤也。在魯而出則曰致女。在他國而來則總曰聘。故桓公三年。春秋曰。九月。夫人姜氏至自齊。冬。齊侯使其弟年來聘。左傳曰。冬。齊仲年來聘。致夫人也。所以篤婚姻之好者也。凡大夫以上。婦皆乘女家之車馬。送嫁時留於夫家。謙不敢自安。若被出棄。則將乘之以歸也。至三月廟見。夫婦之情既固。則夫家遣使反馬。示偕老也。左傳宣公五年。

十七 凡新有昏者期不使禮記禮運故臣民新昏當歸於其家期年之內可以不任國此正禮也據詩經女手不可以縫裳婦人三月廟見然後執婦功則新昏之臣遇國有大事於三月之後亦當使之若事勢急迫如禹以辛日娶妻以甲日被命治水僅越三宿此亦萬不得已之法也尚書皋陶謨

孔教最重人情人情之最私者莫如男女而最畏者莫如死亡使民離男女之愛以趨死亡之事此亦聖人之所閔也故周公東征三年而歸勞歸士其詩曰自我不見于今三年言其婦之望夫也又曰其新孔嘉其舊如之何言其夫之樂婦也鄭玄曰其新來時甚善至今則久矣不知其如何也又極序其情樂而戲之蓋歸士於出征之時

有新昏未久者。周公尤閔其拋棄此最歡樂之光陰。以從事於征戰。故極其殷勤而慰勞之。所謂說以使民。民忘其死也。西人不識經義。或謂中國人短於愛情。豈知新有昏者。期不使竟有周年之蜜月乎。

四 妾媵

一 凡夫妻敵體。故自天子至於庶人。妻唯有一。然古者封建時代。天子諸侯大夫皆世襲。故繼嗣最重。天子諸侯且為天下國家主權所繫。其繼嗣尤重。當廣嗣以強公室。是故天子娶十二女。諸侯九卿大夫三士二。其中各有一妻。此外則皆妾媵也。凡天子諸侯不得再娶。所以節人情。開媵路。防其棄德而嗜色也。故姪娣年雖少。猶從適人。不過還待年於父母之國而已。姪娣雖缺。不得補。所以養壽塞爭。

也。姪者兄之子也。娣者女弟也。備姪娣從者。為其必不相嫉妬也。一人有子。三人共之。若己生也。不娶兩娣者。博異氣也。諸侯娶一國。則二國往媵之。以姪娣從者。廣異類也。一國血脈相似。俱無子。故娶三國女也。二國來媵。則大國為尊。國同以德。德同以色。君不求媵。二國自往媵夫人者。所以一夫人之尊也。且人有子孫。皆欲尊之。而妾雖賢。不得為嫡。義不可求人為賤。故無聘妾之禮也。公羊傳莊公十九年白虎通。

二 凡卿大夫士雖無國。然為尊賢重繼嗣之故。故卿大夫得有二妾。士得有一妾。白虎通。

凡庶人一夫一婦無妾。故稱匹夫匹婦。論語第十四要而論之。孔教。

最重繼嗣。孔子曰：父母生之，續莫大焉。孝經此言父母之功，莫大乎為社會生子，以繼續其種類也。孟子曰：不孝有三，無後為大。第七此言人子之罪，莫大乎不娶無子，絕先祖祀也。孔教之重子嗣如此。而一夫一婦，則無後之缺憾，將無從補救。故妾媵之制，終不能廢。惟立妾逾限，非為子嗣起見者，斯則孔教所禁矣。

三 凡婦人以眾多為侈。故伯姬以至賢，為衛晉齊三國所爭媵。春秋侈大其能容眾妾而不妬也。公羊傳成公十年召南曰：維鵲有巢，維鳩盈之。盈，滿也。言眾媵姪娣之多也。大雅曰：諸娣從之，祁祁如雲。韓侯顧之，爛其盈門。此皆以眾多為侈之義也。

四 凡婦人雖以多妾為大，然男子若納妾逾制，則春秋以為非禮。

而貶之。故春秋雖大姬能容三國之媵，然究以多取三國媵為非禮。而貶其夫。成公十五年，春秋曰：夏六月，宋公固卒。大國君卒例曰：此不日者，所以著宋公多媵之失德也。是故多媵妾者，非孔子之所許也。

五 凡夫不得以妾為妻。故春秋於僖公八年，夫人不稱婦姜氏，而但稱夫人，明其篡嫡也。凡妾之事嫡，猶臣之事君同。

六 凡媵雖賤，能有賢行，則春秋書之。隱公七年，書叔姬婦於紀，是也。

七 凡嫡死，則媵有升為嫡之權利。紀叔姬之繼伯姬是也。凡母以子貴，妾子立，則母得為夫人。夫人成風是也。公羊傳：莊公二十九年

隱公元年五年凡妾母卑雖為夫人猶特廟祭之子死則廢隱公考仲子之宮是也廟廢後則於廟中為壇祭之公羊傳莊公二十九年隱公元年五年

五 休棄及改嫁

一 凡婦有七去不順父母去為其逆德也無子去為其絕世也淫去為其亂俗也妬去為其亂家也有惡疾去為其不可與共粢盛也口多言去為其離親也盜竊去為其反義也七去之法或有議其過嚴者然去婦令可嫁此七去者亦不為過以為名耳不必太泥之也婦有三不去有所取無所歸不去不窮窮也與更三年喪不去不忘恩也前貧賤後富貴不去不背德也然若淫與不孝雖應此三事猶當去之大戴禮第八十

二 凡后夫人不以無子出。惟有六出而已。天子無出道。后雖犯六出。亦不出之。廢遠之而已。

三 凡出婦之義。必送之。接以賓客之禮。君子絕愈于小人之交也。白虎通。凡諸侯出夫人。夫人比至于其國。以夫人之禮行。至以夫人入。使者將命曰。寡君不敏。不能從而事社稷宗廟。使使臣某敢告於執事。主人對曰。寡君固前辭不教矣。寡君敢不敬須以俟命。有司官陳器皿。主人有司亦官受之。凡卿大夫以下出妻。夫使人致之曰。某不敏。不能從而共粢盛。使某也敢告於侍者。主人對曰。某之子不肖。不敢辟誅。敢不敬須以俟命。如姑姊妹見棄。則曰。某之姑若姊若妹不肖。使者退。主人拜送之。棄妻者。舅在則稱舅。舅沒則稱兄。無兄則

稱夫命當由尊者出也。禮記雜記

四 凡已棄之婦，有更適人之道。公羊傳注：宣公十六年。

五 凡婦人從一而終，壹與之齊，終身不改。故夫死不嫁，此正義也。

若夫死無男，則有更嫁之道。有子而幼，又無大功之親，亦可適人。禮

記郊特牲：公羊傳文公十八年儀禮喪服傳。

六 凡女未嫁而壻死，女當改適。惟王者妃匹至尊，無偶。一有王命

即為后，設遭大故，不得更許嫁。公羊傳：桓公八年。若諸侯夫人以下

未昏而守志者，本屬難行。故孔子不定為通禮。其行之者，孔子亦取

之邶風柏舟之詩是也。

六 婦德以貞為本

凡婦人以貞為行。雖有百行。而貞為之本。故孔子以伯姬為賢女之代表。於春秋詳錄之。成公八年。春秋曰。夏。宋公使公孫壽來納幣。公羊傳曰。納幣不書。此何以書。錄伯姬也。是年冬。又曰。衛人來媵。明年。又曰。二月。伯姬歸于宋。夏。孫^季行父如宋。致女。晉人來媵。十年五月。又曰。齊人來媵。春秋之例。不書媵。不言致女。今書之。言之者。錄伯姬也。十五年。又曰。夏六月。宋公固卒。秋八月庚辰。葬宋共公。穀梁傳曰。月卒日葬。非葬者也。此其言葬何也。以其葬共姬。不可不葬共公也。葬共姬則其不可不葬共公何也。夫人之義。不踰君也。為賢者崇也。蓋伯姬賢而共公不答。是為失德。例不書葬。今葬之者。因崇伯姬而及之耳。時孔子前二十五年也。及孔子九年。為襄公三十年。歷三十四

年而伯姬以老年之寡婦守嚴格之貞節逮火而死春秋書之曰五月甲午宋災伯姬卒穀梁傳曰取卒之日加之災上者見以災卒也其見以災卒奈何伯姬之舍失火左右曰夫人少辟火乎伯姬曰婦人之義傳母不在宵不下堂左右又曰夫人少辟火乎伯姬曰婦人之義保母不在宵不下堂遂逮乎火而死婦人以貞為行者也伯姬之婦道盡矣詳其事賢伯姬也春秋又曰秋七月叔弓如宋葬宋共姬公羊傳曰外夫人不書葬此何以書隱之也何隱爾宋災伯姬卒焉其稱謚何賢也是冬春秋又曰晉人齊人宋人衛人鄭人曹人莒人邾婁人滕人薛人杞人小邾婁人會于澶淵宋災故公羊傳曰宋災故是者何諸侯會于澶淵凡為宋災故也會未有言其所為者此其

言所為何錄伯姬也。諸侯相聚而更宋之之所喪曰死者不可復生。爾財復矣。蓋春秋之特書宋災故者。重錄伯姬之賢。為諸侯所閔憂也。是故伯姬以一女子之身而孔子特筆書之者十。納幣三媵歸宋。此五者穀梁傳所謂盡其事也。致女災卒。此二者穀梁所謂詳其事也。常不志特志曰盡。常畧特不畧曰詳。皆即公羊所謂錄也。葬宋共公。特崇之也。葬宋共姬。隱之也。宋災故重錄之也。孔子曰。書之重辭之複。嗚呼。不可不察。其中必有美者焉。公羊傳注僖公四年。公羊傳曰。春秋辭繁而不殺者正也。僖公二十二年。以吾觀之。春秋之重複而繁重。未有如錄伯姬者也。君子之道。造端夫婦。中庸家人之義。利在女貞。易經其諸春秋錄伯姬之意與。

七 淫為大惡

一 孔子曰刑以坊淫禮記坊記故春秋以淫為大惡凡諸侯之外淫者其國當絕桓公六年春秋曰蔡人殺陳佗公羊傳曰陳佗者何陳君也陳君則曷為謂之陳佗絕也曷為絕之賤也其賤奈何外淫也惡乎淫淫于蔡蔡人殺之何注曰蔡稱人者與使得討之故從討賊辭也桓公十二年春秋曰八月壬辰陳侯躍卒何注曰不書葬者佗子也佗不稱侯者嫌貶在名例不當絕故復去躍葬也然則雖以國君之尊而外淫于他國則他國中人人得視之為賊討而殺之矣既殺其身又絕其國雖其子亦從誅君之子不立之例不得書葬蓋春秋之惡淫也如是

二 春秋之所謂淫者。不論和姦強姦。皆以為大惡。如莊公之於哀姜。先淫後娶。則和姦必矣。而春秋於莊公二十二年。書曰冬公如齊納幣。何注曰。時公實以淫佚大惡不可言。故因其有事於納幣。以無廉耻為譏。凡公之齊。所以起淫者。皆以危致也。二十三年。春秋曰春公至自齊。公羊傳曰桓之盟不日。其會不致。信之也。此之桓國何以致危之也。何危爾。公一陳佗也。蓋公淫于齊。與佗淫于蔡等也。春秋又曰祭叔來聘。何注曰。不稱使者。公一陳佗。故絕使。若我無君。以起其當絕。因不與天子下聘。小人春秋又曰夏公如齊觀社。穀梁傳曰。常事曰視。非常曰觀。觀無事之辭也。以是為尸女也。無事不出竟。蓋觀社者。觀祭社也。齊社為男女聚觀之所。觀社者。並無他事。志又不

在觀祭意主於女而已。故云尸女也。時實以淫佚大惡不可言。因其名為觀社。故以無事出竟遊觀譏之。其下曰公至自齊。危之時也。二十四年春秋曰。夏公如齊逆女。時公如齊逆女。時公如齊本實淫通。非為親迎。但春秋以其大惡不可言。故諱使若以得親迎之禮書也。其下又曰。秋公至自齊。亦以其淫而危之也。然則莊公淫於未娶之夫人。而春秋以為大惡。著其當絕。且詳譏之。此可見春秋惡淫之甚矣。

三 非特君之淫為大惡也。夫人之淫亦為大惡。桓公十八年春秋曰。公夫人姜氏遂如齊。不言公及夫人。以文姜淫於其兄齊襄公而絕外之也。莊公二十四年八月。哀姜始歸。是秋春秋即書大水。夫人

不制遂淫二叔陰氣盛之故也。明年六月又書日食。又書秋大水。二十六年十二月又書日食。二十八年冬書大無麥禾。明其有秋水也。明年書秋有蜚。蜚者臭惡之蟲。象夫人有臭惡之行也。三十年九月書日食。凡此皆著哀姜之淫。上致天變。即春秋所以罪哀姜也。夫文姜淫於其兄而致齊襄誘殺桓公。以危魯國。結齊魯之讎。哀姜淫於二叔與慶父叔牙三人共脅莊公。以專國政。後又與慶父共弑子般。閔公幾亡魯國。是皆夫人淫之罪也。淫者殺機必生禍亂。求平和者得不以為大惡而嚴禁之耶。

四 非特君與夫人之淫為大惡也。大夫之淫亦為大惡。文公十四年單伯送子叔姬于齊。而道淫之為齊所執。明年春秋書曰。單伯至

自齊何注曰大夫不致此致者喜患禍解也不省去氏者淫當絕使若他單伯至也蓋春秋之義大夫淫則絕之不使仍得為大夫後不錄其卒者亦絕之之義也以其幸不發生國際之患禍故喜而致之諱使若他單伯至也推春秋絕單伯之義則士庶之淫者罪亦當絕矣

五 凡不能防正其母妻女姊妹而使發生淫行者孔子惡而貶之齊風猗嗟之詩序曰刺魯莊公也齊人傷魯莊公有威儀技藝然而不能以禮防閑其母失子之道人以為齊侯之子焉又徹筭之詩序曰刺文姜也齊人惡魯桓公微弱不能防閑文姜使至淫亂為二國患焉孔子列之於詩所以示子道與夫道也春秋於桓公十一年

書曰柔會宋公陳侯蔡叔盟于折夫蔡當稱侯今絕奪其爵而貶稱字者以其不能防正其姑姊妹使淫於陳佗也以此言之凡不能防正家人致有淫惡者其家長當受褫去爵位剝奪公權之罰矣

八 婦女之地位

一 凡婦人外成不得獨繫父母故不稱公子生以父母為家嫁以夫為家故謂嫁曰歸明有二歸之道公羊傳注隱公二年凡婦人有三從之義少繫父既嫁繫夫夫死繫子文公九年春秋曰秦人來歸僖公成風之祿不言及成風成風尊也母尊序在下者明繫子之義也凡母在子年無適庶皆繫子不在子年適母繫夫庶母繫子公羊傳注莊公二十二年

二 凡婦人許嫁字而笄之字者尊而不泄所以遠別也笄者明繫屬於人所以養貞一也雖未許嫁年二十則亦字而笄之矣許嫁而死以成人之喪治之不以殤禮降也伯姬許嫁于邾婁僖公九年卒春秋曰秋七月乙酉伯姬卒從諸侯夫人例也

三 凡婦人以字通以姓配字不忘本也因示不適同姓諸侯夫人死則以姓配謚欲使終不忘本也公羊傳注莊公二十七年隱公元年莊公二十二年

四 凡女在其國稱女在塗稱婦入國稱夫人惟王者無外故王姬在塗猶稱王姬王后在國已成王后公羊傳隱公二年莊公十一年桓公八年

五 凡父母之於子。雖為天王后。或為鄰國夫人。猶曰吾女某。蓋子尊不加於父母。所以崇父子之親也。故桓公九年。紀季姜王后也。而春秋曰紀季姜歸于京師。桓公三年。姜氏魯夫人也。而春秋曰齊侯送姜氏于讌。不稱王后及夫人也。

六 凡天子諸侯絕期。大夫絕總。天子唯女之適二王後者。諸侯唯女之為諸侯夫人者。恩得申。故莊公四年。春秋曰三月紀伯姬卒。

七 凡邦君之妻。君稱之曰夫人。夫人自稱曰小童。邦人稱之曰君

夫人。稱諸異邦曰寡小君。異邦人稱之亦曰君夫人。論語第十六

八 凡失國之夫人。從夫人行。待之以初。故紀滅於莊公四年。而二十九年。春秋曰十有二月紀叔姬卒。又被出之夫人。母國亦待之以

初故成公五年春王正月杞叔姬來歸而八年春秋曰冬十月癸卯杞叔姬卒

九 婦人無外事

一 凡婦人無外事外則近淫公羊傳注莊公二年穀梁傳曰婦人既嫁不踰竟踰竟非正也婦人不言會言會非正也饗甚矣莊公二年春秋曰冬十有二月夫人姜氏會齊侯于禚四年又曰春王二月夫人姜饗齊侯于祝上穀梁傳曰饗甚矣饗齊侯所以病齊侯也蓋齊襄公屢淫於其妹故春秋甚惡之也春秋於兩君相饗從無書者而獨書齊姜之饗齊襄其為甚且病不大明乎考之古禮王饗諸侯及諸侯自相饗皆行之於廟同姓則后夫人親獻異姓則使人攝獻

及陽侯以同姓之君受繆侯之饗竟殺繆侯而竊其夫人故大饗廢夫人之禮禮記坊記然則雖以同姓之君在宗廟之地后夫人亦不得與於饗禮矣今春秋書祝上則非宗廟也書齊侯則非同姓也書夫人則非攝獻也以國君之母乃竊出而獨行饗禮於外春秋書此豈特以甚文姜而病齊襄乎抑亦以病魯莊矣

二 凡諸侯夫人非奔父母之喪及大歸皆無出道文公九年春秋曰夫人姜氏如齊奔喪也十八年又曰夫人姜氏歸于齊大歸也皆合禮者也禮記雜記曰婦人非三年之喪不踰封而弔如三年之喪則君夫人歸其歸也以諸侯之弔禮其待之也若待諸侯然

三 凡諸侯夫人尊重雖父母在亦不得歸寧惟使卿歸寧歿則否

也。襄公十二年。左傳曰。秦嬴歸于楚。楚司馬子庚聘于秦。為夫人寧禮也。唯自大夫妻以下。雖無事。歲一歸宗。公羊傳注莊公二十七年。蓋天子諸侯位高。恐其專恣。淫亂。故禮於王后及諸侯夫人。禁其自行歸寧。大夫以下。位卑畏威。故許之也。然此亦謂大夫娶乎國內者耳。若大夫娶乎鄰國。則仍不得歸寧。宣公五年。春秋曰。冬。齊高固及子叔姬來。譏子叔姬越竟歸宗。而坐其夫高固以失教戒之咎也。

四 凡婦人不獨身不出外。即其名亦不合。外接於人。故母命不通。但得命使於國中。不得通於四方。隱公二年。春秋不書紀侯之母。但曰紀履緌來逆女。是也。

五 凡婦人無武事。故婦人廟獨奏文樂。不得有武舞。公羊傳注隱

公五年

十 婦女與政治

一 凡女子以不得干預政治為原則。易曰：家人女正位乎內，男正位乎外，男女正天地之大義也。穀梁傳曰：毋使婦人與國事。僖公九年此公理也。蓋使天下可以無家，則女子可棄其內之正位而務乎外之自由。若猶不能無家，則家內之事非女子莫屬，故內外辨位，男女分功，此不得不然之勢也。

二 凡女子有特別才德者，亦有政治之權利。論語曰：舜有臣五人而天下治。武王曰：予有亂世臣十人。孔子曰：才難不其然乎？唐虞之際，於斯為盛，有婦人焉，九人而已。卷第八蓋武王之十亂中有一婦

人若非此婦人則不足十亂之數故孔子歎為才難也此婦人者或以為武王之母或以為武王之妻然子無臣母之道當作其妻為是蓋邑姜也但邑姜雖列於十亂亦祇在家整理內治充其極量不過在內以盡其謀議之職耳必非如九人之供職於外者也然而婦人與國事固已出於原則之外矣孔子於此無譏辭而有美辭蓋特別之才當享特別之權利也以才難之故也

邑姜以婦人參預大政此政權之最高者也然猶不過正位乎內耳尚有以婦人而供職於外者則采詩之使者是也公羊傳注記井田之制曰男年六十女年五十無子者官衣食之使之民間求詩宣公十五年則女子之資格因可以當輶軒之選矣官尊任重孰謂女子

不聞國政也乎。然其年歲以五十為限。其境遇以無子為限。既為老而無子者。開一選用之途。以盡國家優養之責。復不令當以抱子為重之少婦。棄其內之正位。而奔走於政治。吾故曰。特別之女子。當任特別之政權。而不能立為普通法也。夫女子之才。至足以任行人之官。為采詩之事。則女子之當受高等教育。又可知矣。此皆春秋之義也。

卷第七 孝弟

一 孝

一 孔子之教以孝為本。故孔子作孝經以為六藝之總會。又以孝經與春秋並舉。蓋孝也者。非獨倫理之根本。家庭之道德已也。實為一切政教之淵源。世界和平之要道也。吾今謹依孝經章次而擇舉之。專明其為和平之根源。若其他蟠天際地之義理。不能徧論也。

第一章曰。先王有至德要道。以順天下。民用和睦。上下無怨。此孝之總義也。曰順。曰和睦。曰無怨。非和平而何。夫至於上下無怨。則非武力保護之和平。而道德涵養之和平矣。故曰夫孝德之本也。教之所由生也。此其所以順天下也。又曰。身體髮膚。受之父母。不敢毀傷。孝

之始也。立身行道，揚名於後世，以顯父母，孝之終也。夫以身體髮膚，而不敢毀傷，則敬身敬親之至。尚何有好勇鬪狠，犯上作亂之事乎？揚名後世，而以立身行道得之，則非智名勇功之謂也。故孝者和平之根源也。

第二章曰：愛親者不敢惡於人，敬親者不敢慢於人。愛敬盡於事親，而德教加於百姓，刑于於四海，蓋天子之孝也。夫以天子之尊貴，而不敢惡慢於人，此則天子之所以和天下也。而一切惡心惡政，無自生矣。愛敬二字，自天子至於庶人，皆以愛敬為主，是為和平之原因。反之而惡慢二字，即為爭戰之原因也。

為孝經之綱領

第三章曰：在上不驕，高而不危；制節謹度，滿而不溢；高而不危，所以

長守貴也。滿而不溢。所以長守富也。富貴不離其身。然後能保其社稷。而和其民人。蓋諸侯之孝也。夫天下之最凶者。莫如兵。最害者亦莫如兵兵也者。使人驕而危。無節度而溢者也。使人失其富貴。致不能保社稷。而和民人者也。誠能知孝經不危不溢之義。以保社稷。和民人為心。則兵禍不作矣。

是故天子之孝。在以愛敬保其天下也。第二章諸侯之孝。在以愛敬保其社稷也。第三章卿大夫之孝。在以愛敬保其宗廟也。守第四章士之孝。在以愛敬保其祿位而守其祭祀也。第五章庶人之孝。在以愛敬守其身體也。故自天子至於庶人。皆各盡其愛敬。以愛敬其親。而並及於人人。以保守其祖父所傳之天下。國家身體髮膚。如是則天

下和平。無上無下。人人皆相愛相敬。尚安有戰爭之患乎。若不能愛敬。或有始而無終。則無論何人爭亂必生。禍患必及。必有不能保守之患。故孝經曰。故自天子至於庶人。孝無終始。而患不及者。未之有也。第六章此從反面以著不和平之患。所以垂戒也。

第七章曰。先王見教之可以化民也。是故先之以博愛。而民莫遺其親。陳之以德義。而民興行。先之以教讓。而民不爭。導之以禮樂。而民和睦。示之以好惡。而民知禁。是故孝也者。他化民之教也。博愛德義。敬讓禮樂。好惡。皆教孝者也。不遺親而興行。不爭而和睦。且知禁焉。則民孝矣。如此尚安有不和平之民性乎。

第八章曰。昔者明王之以孝治天下也。不敢遺小國之臣。而況於公

侯伯子男乎。故得萬國之懽心。以事其先王。治國者不敢侮於鰥寡。而況於士民乎。故得百姓之懽心。以事其先君。治家者不敢失於臣妾。而況於妻子乎。故得人之懽心。以事其親。夫然。故生則親安之。祭則鬼享之。是以天下和平。災害不生。禍亂不作。故明王之以孝治天下也如此。此孔子明言孝治為和平天下之道也。蓋凡孝治者。無論治天下。治國。治家。皆以愛敬為本。愛親者不敢惡於人。此博愛之義也。敬親者不敢慢於人。此平等之義也。不惡不慢。故自天子至於庶人。皆各因其所治範圍之大小。而各得其懽心。以事其親。此合天下為一家。世界和平之極則也。

第九章曰。故不愛其親而愛他人者。謂之悖德。不敬其親而敬他人

者謂之悖禮。以順則逆。民無則焉。不在於善。而皆在於凶德。雖得之。君子不貴也。此孔教之所以異於他教者也。他教或以愛敬他人為號召。而反抱缺憾於其親。以孔教視之。則逆而不順。無論其愛敬他人。未得見諸實事。雖得之。君子不貴也。何也。以其不順於人情。其施行甚悖也。是故他教之所謂愛敬他人者。先絕其本而遠求其末。孔教之所謂愛敬他人者。先立其本而推及其末。一順一逆。一善一凶。天下人當知所擇矣。由順而善者行之。則不求和平而自然和平者也。由逆而凶者行之。則雖求和平而不得和平者也。此有本與無本之異也。

第十章曰。事親者。居上不驕。為下不亂。在醜不爭。居上而驕。則亡。為

下而亂則刑。在醜而爭則兵。三者不除。雖日用三牲之養。猶為不孝也。居上為下在醜。此三種之社會也。驕亂爭。此和平之反面。即惡慢之所致也。然而亡刑兵即隨之。所謂自天子至於庶人。孝無終始。而患不及者。未之有也。雖日用三牲之養。豈得為孝哉。

第十一章曰。五刑之屬三千。而罪莫大於不孝。要君者無上。非聖人者無法。非孝者無親。此大亂之道也。夫孝為大順之道。不孝為大亂之道。崇順而禁亂。不得不重其罪矣。君師者治之本。故要君非聖。罪亦綦嚴。皆所以塞亂源也。此維持和平之法律也。

第十二章曰。教民親愛。莫善於孝。教民禮順。莫善於悌。移風易俗。莫善於樂。安上治民。莫善於禮。禮者敬而已矣。故敬其父則子悅。敬其

兄則弟悅。敬其君則臣悅。敬一人而千萬人悅。所敬者寡而悅者眾。此之謂要道也。第十三章曰：君子之教以孝也。非家至而日見之也。教以孝所以敬天下之為人父者也。教以悌所以敬天下之為人兄者也。教以臣所以敬天下之為人君者也。詩云：愷悌君子，民之父母。非至德其孰能順民如此其大者乎？德者愛敬也。愛敬及天下，謂之至德。孝弟是也。道者所以行愛敬者也。愛敬一人而千萬人悅，謂之要道。禮樂是也。悌與孝同體。臣與子同道。故並言之。孔子之教起於躬行。苟自盡其孝悌，臣以自事其父兄，君而即所以敬天下之為人兄者。是之謂教。是之謂順民如此其大，故謂之至德也。既敬天下之為人兄者，而天下之子弟臣皆自生其事，父事兄事君之心，是

之謂悅。悅則興孝興弟作忠。而愛不可勝用。敬不可勝用。親愛禮順。成為風俗。上安下治。澤被眾庶。而禮樂興矣。此之謂要道也。既有至德。復以要道行之。則天下和平。災害不生。禍亂不作矣。已以敬行。而人以悅應。天下之間。藹然孝悌。尚何有爭戰之禍乎哉。

尤有進者。孔子既躬行孝悌。臣之至德。以為身教。而敬天下之為人父為人兄為人君者。其德已至矣。其順民已大矣。已為民之父母矣。復制作六藝。孝經宣揚孝悌。臣之至德。以為言教。而教萬世之為人父為人兄為人君者。其德又更至矣。其順民又更大矣。其永為民之父母。將與天無極矣。而萬世之為人子為人弟為人臣者。誦讀六藝。孝經莫不自動其孝悌忠敬之本心。所謂子悅弟悅臣悅也。所愛敬

者至寡而萬世之悅者其眾至不可紀。極道之要莫要於此矣。教之行於己者其順民最大而教之及於人者其悅民又最眾。此之謂有至德要道以順天下。民用和睦。上下無怨者也。為萬世開太平。非孔教莫屬矣。世之有志於和平者其亦講明孔教而實行之哉。

二 凡孝之義無所不包。故能總括一切道德。曾子曰。身也者。父母之遺體也。行父母之遺體。敢不敬乎。居處不莊。非孝也。事君不忠。非孝也。莅官不敬。非孝也。朋友不信。非孝也。戰陳無勇。非孝也。五者不遂。裁及於親。敢不敬乎。曾子又曰。樹木以時代焉。禽獸以時殺焉。夫子曰。斷一樹。殺一獸。不以其時。非孝也。禮記祭義。此可見孝之無所不包也。夫人苟能常以父母遺體為念。而無一事不敬其身。乃至一

木一獸亦不敢任意殺伐。此其人尚有^豈不樂平和而好爭戰者乎。誠能廣傳孝義。天下和平之福。必可操券而獲矣。然所謂孝者。非愛身而惜死。顧家而忘國。仁而不武之謂也。曾子明指戰陳無勇為非孝。而孝字之真義可以覩矣。蓋孝子固深愛平和。然敵人苟破壞平和。而出於戰。則孝子亦惟有奮勇力戰。以為敬身之道耳。豈以貪生畏死。為保存父母遺體之道也哉。是故孝子者。於平時則能醞釀平和。於戰時又能保衛平和者也。蓋能戰而後能和也。

三 凡事親之禮。其列舉無遺者。莫如孝經紀孝行章。孔子曰。孝子之事親也。居則致其敬。養則致其樂。病則致其憂。喪則致其哀。祭則致其嚴。五者備矣。然後能事親。此事親之條目也。春秋一經。其著事

親之禮者莫顯於書許世子止。斯所謂病則致其憂者也。明乎此而五者皆可推而知矣。昭公十九年春秋曰夏五月戊辰許世子止弑其君買冬葬許悼公。公羊傳曰賊未討何以書葬不成于弑也。曷為不成于弑止進藥而藥殺也止進藥而藥殺則曷為加弑焉爾。譏子道之不盡也。其譏子道之不盡奈何曰樂正子春之視疾也復加一飯則脫然愈復損一飯則脫然愈復加一衣則脫然愈復損一衣則脫然愈止進藥而藥殺是以君子加弑焉爾。曰許世子止弑其君買是君子之聽止也。葬許悼公是君子之赦止也。赦止者免止之罪辭也。明止但得免罪不得繼父也。

甲 喪祭之禮

一 凡喪祭之禮。所以明臣子之恩也。喪祭之禮廢。則臣子之恩薄。而倍死忘生者眾矣。禮記經解是故曾子曰。慎終追遠。民德歸厚矣。論語第二。今欲納民於仁厚。以養其平和之德性。則喪祭之禮。不可不講也。夫喪祭之禮。所以仁死者也。對於死者而尚仁之。況生者乎。此民德之所以歸厚也。厚則平和矣。

二 禮記三年問一篇。言喪禮之興。由於愛其同類。而人之所以羣居和壹而不亂者。皆在於是。言甚精要。謹節錄之如左。凡生天地之間者。有血氣之屬。必有知。有知之屬。莫不知愛其類。今是大鳥獸。則失喪其羣匹。越月踰時焉。則必反巡過其故鄉。翔回焉。

鳴號焉。蹢躅焉。踟躕焉。然後乃能去之。小者至於燕雀。猶有啁噍之
頃焉。然後乃能去之。故有血氣之屬者。莫知於人。故人於其親也。至
死不窮。

將由夫患邪淫之人與。則彼朝死而夕忘之。然而從之。則是曾鳥獸
之不若也。夫焉能相與羣居而不亂乎。將由夫脩飾之君子與。則三
年之喪。二十五月而畢。若駟之過隙。然而遂之。則是無窮也。故先王
焉為之立中制節。壹使足以成文理。則釋之矣。

然則何以至期也。曰至親以期斷。是何也。曰天地則已易矣。四時則
已變矣。其在天地之中者。莫不更始焉。以是象之也。然則何以三年
也。曰加隆焉爾也。焉使倍之。故再期也。由九月以下何也。曰焉使弗

及也。故三年以為隆。緦小功以為殺。期九月以為間。上取象於天。下取法於地。中取則於人。人之所以羣居和壹之理盡矣。

故三年之喪。人道之至文者也。夫是之謂至隆。是百王之所同。古今之所一也。未有知其所由來者也。孔子曰。子生三年。然後免於父母之懷。夫三年之喪。天下之達喪也。

三 凡子未三年。無改於父之道。故春秋繫閔公篇於莊公下。論語第二

四 凡父卒而子便為大夫。則春秋以為不孝。蓋當時雖世大夫。而緣孝子之心。不忍便當父位。故先試一年。乃命於宗廟。今武氏子父新死。未命而便為大夫。薄父子之恩。故春秋於隱公三年書曰。武氏

子來求賻稱氏言子見其未命以譏之也今日大夫既不得世則孝子必待三年喪畢然後可以服官耳

五 凡三年之內不圖婚文公二年春秋曰公子遂如齊納幣公羊傳曰納幣不書此何以書譏何譏爾譏喪娶也娶在三年之外則何譏乎喪娶三年之內不圖婚吉禘于莊公譏然則曷為不於祭焉譏三年之恩疾矣非虛加之也以人心為皆有之以人心為皆有之則曷為獨於娶焉譏娶者大吉也非常吉也其為吉者主於己以為有_心人焉者則宜於此焉變矣

六 凡三年喪未畢當思慕悲哀未可以鬼神事之故未可以吉祭莊公於三十三年八月癸亥薨而春秋於閔公二年書曰夏五月乙

酉吉禘于莊公。公羊傳曰：言吉者，未可以吉也。未三年也。三年矣。曷為謂之未三年？三年之喪，實以二十五月。其言于莊公何？未可以稱宮廟也。曷為未可以稱宮廟？在三年之中矣。吉禘于莊公，何以書？譏始不三年也。蓋春秋之始也。

七 凡生死殊路，故敬鬼神而遠之。緣生以事死，敬亡若事存，故孝子三年喪畢，思念其親，為之立宗廟以鬼享之。宗者尊也，廟者貌也。象先祖之尊貌也。白虎通公羊傳注桓公二年。

乙 居喪免役

凡君子不奪人之親，亦不可奪親也。是故雖有兵事，遇喪則避之。孔子之制，父母之喪，三年不從政。齊哀大功之喪，三月不從政。禮記王

制此正禮也。十三月已練之後，苟有金革之事，人君本不當使臣服之。然臣或既受君命，則不顧私恩而行之，亦權禮也。公羊傳宣公元年，若國有急難，萬不獲已，則士於三月卒哭之後，大夫於五月卒哭之後，諸侯於七月卒哭之後，亦可以不辟金革，但攻取之兵是為從利，自不得奪情。禮記曾子問

其在庶人，則三年之喪，十三月既祥而從政。期之喪，三月卒哭而從政。九月之喪，三月既葬而從政。小功緦之喪，三日既殯而從政。禮記雜記未從政以前，則國民固不負兵役之義務也。

二 孝弟

孔子曰：立愛自親始，教民睦也；立敬自長始，教民順也；教以慈睦，而

民貴有親教以敬長而民貴用命孝以事親順以聽命錯諸天下無所不行禮記祭義有子曰其為人也孝弟而好犯上者鮮矣不好犯上而好作亂者未之有也君子務本本立而道生孝弟也者其為人之本與論語第一夫戰爭之禍成於不仁而起於不睦不順故孔子以孝弟為本以生仁道立愛自親始立敬自長始則本立矣孝以事親順以聽命錯諸天下無所不行則道生矣孝弟為仁之本即為和平之本此孔教救世之要道也

孟子曰人之所不學而能者其良能也所不慮而知者其良知也孩提之童無不知愛其親也及其長也無不知敬其兄也親親仁也敬長義也無他達之天下也卷第十三此言孝弟根於天性即仁義之

性為天下人所通有，無待於學問思慮者也。此孟子所以道性善也。

孟子曰：人之實，事親是也；義之實，從兄是也；智之實，知是二者弗去是也；禮之實，節文斯二者是也；樂之實，樂斯二者。樂則生矣，生則惡可已也；惡可已則不知足之蹈之舞之。卷第七。此言事親從兄為仁，義智禮樂之實，故孝弟二字包括一切道德教化。而孟子亦曰：堯舜之道，孝弟而已矣。卷第十二。此人之所以皆可為堯舜，而孟子所以言必稱堯舜也。卷第五。

孟子曰：道在邇而求諸遠，事在易而求諸難，人人親其親長其長而天下平。卷第七。此言孝弟之道雖邇，其事雖易，實為天下和平之根。

源不求其效而效自至。若舍是而求諸遠求諸難則雖勞而無功也。按孟子每以孝弟並言然孝實可以包弟亦猶孟子每以仁義並言而仁實可以包義也。

孟子曰三代之得天下也以仁其失天下也以不仁國之所以廢興存亡者亦然天子不仁不保四海諸侯不仁不保社稷卿大夫不仁不保宗廟士庶人不仁不保四體卷第七此孝經之義也蓋孝者仁之本仁者孝之施不仁即不孝而不孝亦未有能仁者也不保其天家下國家身體髮膚此孝無終始之患也患禍既生則天下無和平之福矣。

三弟

凡野蠻好戰之國。則貴壯而賤老。文明尚德之國。則尊老而卑少。漢時之匈奴。壯者食肥美。老者飲食其餘。貴壯健。賤老弱。蓋以戰爭為生涯。其不得不賤老者勢也。若中國則脩文偃武。勢無取乎賤老。加以尚德尚齒。義在尊賢。教順教讓。道在化俗。故長幼之節。兄弟之倫。成為天然之秩序。普天下之老年人。其尊貴莫有中國若者也。中國以偃武之故而教弟。以教弟之故而益能偃武。此相因之效也。祭義曰。昔者有虞氏貴德而尚齒。夏后氏貴爵而尚齒。殷人貴富而尚齒。周人貴親而尚齒。虞夏殷周之盛王也。未有遺年者。年之貴乎天下久矣。次乎事親也。

是故朝廷同爵則尚齒。七十杖於朝。君問則席。八十不俟朝。君問則就之。而弟達乎朝廷矣。行肩而不併。不錯則隨。見老者則車徒辟。斑白者不以其任行乎道路。而弟達乎道路矣。居鄉以齒。而老窮不遺。強不犯弱。眾不暴寡。而弟達乎州巷矣。古之道。五十不為甸徒。頒禽隆諸長者。而弟達乎搜狩矣。軍旅什伍。同爵則尚齒。而弟達乎軍旅矣。孝弟發諸朝廷。行乎道路。至乎州巷。放乎搜狩。脩乎軍旅。眾以義死之。而弗敢犯也。

食三老五更於大學。天子袒而割牲。執醬而饋。執爵而醕。冕而總干。所以教諸侯之弟也。是故鄉里有齒。而老窮不遺。強不犯弱。眾不暴寡。此由大學來者也。

天子巡守諸侯待于竟天子先見百年者八十九十者東行西行者弗敢過西行東行者弗敢過欲言政者君就之可也

壹命齒于鄉里再命齒于族三命不齒族有七十者弗敢先

七十者不有大故不入朝若有大故而入君必與之揖讓而后及爵

者禮記祭義

弟道達乎天下至於眾以義死之而弗敢犯此亦深入人心之至者矣老窮不遺強不犯弱眾不暴寡此則致天下於和平之道也

四 鄉飲酒禮

鄉飲酒之禮所以明長幼之序也鄉飲酒之禮廢則長幼之序失而爭鬪之獄繁矣禮記經解吾故曰鄉飲酒之禮孔教之所以和社會

也。此孔子保和之道也。請畧述鄉飲酒義以明之。

鄉飲酒義曰。鄉飲酒之義。主人拜迎賓于庠門之外。入三揖而后至階。三讓而后升。所以致尊讓也。盥洗揚觶。所以致絜也。拜至。拜洗。拜受。拜送。拜既。所以致敬也。尊讓絜敬也者。君子之所以相接也。君子尊讓則不爭。絜敬則不慢。不慢不爭。則遠於鬪辨矣。不鬪辨則無暴亂之禍矣。斯君子之所以免於人禍也。故聖人制之以道。

祭薦祭酒。敬禮也。嘑肺嘗禮也。啐酒成禮也。於席末。言是席之正。非專為飲食也。為行禮也。此所以貴禮而賤財也。卒觶致實於西階上。言是席之上。非專為食飲也。此先禮而後財之義也。先禮而後財。則民作敬讓而不爭矣。

鄉飲酒之禮六十者坐五十者立侍以聽政役所以明尊長也六十者三豆七十者四豆八十者五豆九十者六豆所以明養老也民知尊長養老而後乃能入孝弟民入孝合諸鄉射教之鄉飲酒之禮弟出尊長養老而後成教成教而後國可安也君子之所謂孝者非家至而日見之也合諸鄉射教之鄉飲酒之禮而孝弟之行立矣

孔子曰吾觀於鄉而知王道之易易也

主人親速賓及介而眾賓自從之至于門外主人拜賓及介而眾賓賓自入貴賤之義別矣

三揖至于階三讓以賓升拜至獻酬辭讓之節繁及介省矣至於眾賓升受坐祭立飲不酢而降隆殺之義別矣

工入升歌三終主人獻之笙入三終主人獻之間歌三終合樂三終
工告樂備遂出一人揚觶及立司正焉知其能和樂而不流也
賓酬主人主人酬介介酬眾賓少長以齒終於沃洗者焉知其能弟
長而無遺矣

降說屨升坐脩爵無數飲酒之節朝不廢朝莫不廢夕賓出主人拜
送節文終遂焉知其能安燕而不亂也

貴賤明隆殺辨和樂而不流弟長而無遺安燕而不亂此五行者足
以正身安國矣彼國安而天下安故曰吾觀於鄉而知王道之易易
也禮記鄉飲酒義

觀鄉飲酒義所言則正身安國之行即由於此此安天下之道也免

於人禍。豈尚有戰爭之禍也哉。

五 親屬相隱

一 凡親屬有得相容隱之義。論語子路篇。葉公語孔子曰。吾黨有直躬者。其父攘羊。而子證之。孔子曰。吾黨之直者異於是。父為子隱。子為父隱。直在其中矣。文公十五年。春秋曰。十有二月。齊人來歸子叔姬。公羊傳曰。其言來何。閔之也。此有罪何閔爾。父母之於子。雖有罪。猶若其不欲服罪然。有罪者。子叔姬於上年冬嫁於齊。為夫人。單伯送之。與單伯道淫也。有罪而猶隱匿之者。所以崇父子之親也。叔姬於文公為姊妹。而傳言父母者。時文公母在。明孝子當申母恩也。為人子而通於春秋。則能以父母之心愛其昆弟姊妹。而友弟之道。

行乎天下矣。春秋之法，有以義治，有以恩治。恩不本義，私恩也。義不本恩，亦非公義也。雖有法度，不足以一天下。天下惟情出於一，故義者必因人之情而為之制。此孔教之所以為^仁人之至，而義之盡也。

二 凡人君親親之道，於骨肉之親，當早為教戒，不使陷於罪戾。若罪狀已成，則已有失教之過。當緩追，以免其死。若必不得已，亦不當自己親與殺戮之事，待有司執法而已矣。隱公元年，春秋曰：夏五月，鄭伯克段于鄆。穀梁傳曰：克者，何能也？何能也？能殺也。何以不言殺？見段之有徒眾也。段，鄭伯弟也。何以知其為弟也？殺世子母弟，目君以其目。君知其為弟也。段，弟也。而弗謂弟，公子也。而弗謂公子，貶之也。段，失子弟之道矣。賤段而甚鄭伯也。何甚乎鄭伯？甚鄭伯之處心。

積慮成於殺也。于鄢遠也。猶曰取之其母之懷中而殺之云爾。甚之也。然則為鄭伯者宜奈何。緩追逸賊。親親之道也。公羊傳曰。母欲立之。已殺之。不如勿與而已矣。蓋以為即不得已。亦當由執政大夫誅之。不當親殺也。書者主惡鄭伯之失親親也。月者亦責臣子之不以時討也。

凡臣子親親之道。雖遇大義滅親之時。猶有不忍誅親之意。故公子牙將弑君。兵械已成。季友為遏亂之故。不得不誅。然猶不直誅而酖之。蓋行誅乎凡。隱而逃之。使託若以疾死。然親親之道也。故春秋於莊公三十二年書之曰。秋七月癸巳。公子牙卒。不言刺而言卒者。為季子諱殺也。

三 凡臣子親親之道。苟能先事遏亂。自當大義滅親。若雖滅親而無益於事。獄又已有所歸。則暫為隱匿。雖不滅親亦可也。緩追之使免於死亦可也。閔公元年。公羊傳曰。孰弑子般。慶父也。殺公牙。今將爾。季子不免。慶父弑君。何以不誅。將而不免。遏惡也。既而不可及。因獄有所歸。不探其情而誅焉。親親之道也。閔公二年。慶父又弑公。公羊傳曰。殺公子牙。今將爾。季子不免。慶父弑二君。何而以不誅。將而不免。遏惡也。既而不可及。緩追逸賊。親親之道也。雖然。義不可以見賊而不殺也。故莊公三十二年。慶父於弑子般後奔齊。而春秋書曰。公子慶父如齊。閔公元年冬。慶父回魯。而春秋繫慶父於齊。書曰。齊仲孫來。為季子諱。縱賊出奔。受賊復來之惡也。至閔公二年。公被弑。

之後春秋書曰公子慶父出奔莒則其罪已正無所諱矣是可知不
探其情而誅者緩追逸賊者不過極暫之事究不能容留罪人也僖
公元年慶父請復入魯季子告其使曰公子不可以入入則殺矣於是
自經而死是賊終不能不討也於不能不隱之時則隱之不能不討
之時則討之春秋所以賢季子也以愛兄之道受逸賊之過義不足
而仁有餘觀過斯知仁矣

孔子四百八十六年漢宣帝詔曰父子之親夫婦之道天性也雖有
患禍猶蒙死而存之誠愛結於心仁厚之至也豈能違之哉自今子
首匿父母妻匿夫孫匿大父母皆勿坐其父母匿子夫匿妻大父母
匿孫罪殊死皆上請廷尉以聞漢書第八此誠親親之義也夫人至

於無親親之恩。坐視骨肉之死而猶忍之。則殺人以自利。亦何所不至。故孔教之許親親得相匿者。非謂罪人之得免罪也。特不欲人之賣親以利己。而許其虧己以存親耳。此長恩養仁之道。而世界和平之根本也。反乎此。則乖戾之氣。殺伐之風。囂然起矣。

四 凡在霸王之位。行霸王之道。則誅不阿親親。故魯哀姜淫泆。二叔殺二嗣子。而齊桓公不以其為姑姊妹之親而私之。召而縊殺之。春秋於僖公元年書曰。夫人姜氏薨于夷。齊人以歸。夷者齊地也。春秋與齊桓之誅哀姜也。

五 凡人臣事君之義。誅伐不得避親戚。故周公誅管蔡。季友酈叔牙。所以防患救亂。坐安眾庶。豈無仁愛之恩。貴絕殘賊之路也。唯人

君然後得申親親之恩。故春秋於殺世子母弟直稱君者甚之也。然
君雖申親親之恩。而臣仍以法律從之事。故瞽瞍殺人。皋陶執之。而
舜不得禁。公族有死罪。王三宥之。而有司走出致刑。此所謂仁之至
而義之盡也。公羊傳莊公三十二年孟子第十三禮記文王世子

